

**Tunngaviusumik atuarfiit namminersortitat angerlarsimaffimmilu
atuartitaaneq il.il. pillugit Inatsisartut inatsisissaattut siunnersuummut
nassuiaatit.**

Nalinginnaasumik nassuiaatit

Siunnersuutip saqqummiunneqarneranut tunuliaqutaasut:

Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqarfik (KIIP) 1999-ip ukiaanerani Nuummi angajoqqaat ilaannit saaffigineqarpoq tunngaviusumik atuarfimmik namminersortumik aallartitserusuttunit. Inatsisartunut ilaasortap Otto Steenholdtip Inatsisartut 1999-imi ukiakkut ataatsimiinneranni siunnersuut aalajangiiffiususaaq saqqummiuppaa, tassani siunnersuutigineqarluni Naalakkersuisut peqquneqassasut Inatsisartut 2000-imi upernaakkut ataatsimiinnissaannut siunnersuummik saqqummiussinissamut, taamaalilluni Kalaallit Nunaanni atuarfinnik namminersortunik pilersitsisinnanissamut inatsisitigut tunngavissaqalersitsisussamik. Naalakkersuisut akissuteqaamminni paasissutissiissutigaat paasinarsissagalarpat naammattumik tunngavissaqanngitsoq, taava Naalakkersuisut siunnerfigigaat siunnersuummut saqqummiunneqartumut naapertuuttumik atuarfiit namminersortut aammalu tunngaviusumik atuarfiit namminersortitat pillugit Inatsisartut inatsisissaattut siunnersuummik Inatsisartut 2000-imi ukiakkut ataatsimiinnissaannut saqqummiussaqaarniarlutik.

KIIP oqaaseqaammik Statsministeriaqarfimmuut piniarpoq, tamatumalu kingorna Naalakkersuisut Allattoqarfianni Inatsisileriffimmit aamma oqaaseqaammik piniarluni, ilaatigut innuttaasut tunngaviusumik atuarfinnik namminersortitanik pilersitsinissamut ingerlatsinissamullu pisinnaatitaaffii aammalu ilaatigut tunngaviusumik atuarfimmik namminersortitanut tunngatillugu Namminersornerullutik Oqartussat malittarisassioortutut oqartussaanagerat pillugu. Tamanna tunngavigalugu apeqqummut siullermut tunngatillugu paasinarsivoq tunngaviusumik atuarfimmik namminersortitamik pilersitsinissaaq immikkut akuersissuteqaarnissaaq pisariaqanngitsoq qularnaarlugu pisinnaatitaaffiummat angajoqqaat atuartussaataasunik qitornallit namminneerlutik aalajangersinnaagaat namminersortumik atuartissanerlugit, soorlu assersuutigalugu tunngaviusumik atuarfimmik namminersortitami, tak. Inatsisit Tunngaviusut § 76. Aalajangersagaq taanna aammattaaq issuarneqaqqippoq § 2, imm. 3-mi Kalaallit Nunaanni meeqqat atuarfii pillugit inatsimmi nr. 579-imi, 29. november 1978-imeersuummi (inatsimmi piginnaatitsissutaasumi) kiisalu meeqqat atuarfiat pillugu Inatsisartut peqqussutaanni nr. 8-mi, 22. maj 2002-imeersumi § 25-imi (atuarfik pillugu peqqussummi). Namminersornerullutik Oqartussat inatsisiliortutut allaffissornermilu pisortatut

oqartussaanerannut tunngatillugu paasinarsisimavoq Namminersornerullutik Oqartussat meeqqat atuarfiata 1980-imi tiguneranut atatillugu atuarfinnut namminersortunut tunngassuteqartut ilanngullugit tigusimannngikkaat. Danmarkimi atuarfiit namminersortut aamma tunngaviumik atuarfiit namminersortut il.il. pillugit inatsimmik nalunaarut nr. 529, 6. juni 2001-imeersoq (lovbekendtgørelse nr. 529 af 6. juni 2001 om friskoler og private grundskoler m.v.) kingullermik allanngortinneqarsimasooq Inatsimmi nr. 413 6. juni 2002-meersumi atuuppoq. Inatsit taanna Kalaallit Nunaannut atuutinngilaq.

Namminersornerullutik Oqartussat aalajangersinnaavaat, atuartitaanermut tunngasut pillugit inatsisiliortutut allaffissornikkullu ingerlatsineq pillugu pisortatut oqartussaanerup tigusissaa, tamatumani tunngaviumik atuarfinnut namminersortitanut tunngasut ilanngullugit, tak. Kalaallit Nunaanni Namminersornerullutik Oqartussat (namminersornerulerneq pillugu inatsit) pillugit inatsit nr. 577, 29. november 1978-imeersumi § 4, imm. 1 aamma 2, inatsimmut ilanngussami imm. 11-mut peqatigitillugu. Suliassaqarfiup tigoreernerata kingorna Namminersornerullutik Oqartussat tunngaviumik atuarfiit namminersortitat malittarisassiorsinnaavaat Inatsisartut inatsisaat aqqutigalugit, tak. namminersorneruneq pillugu inatsimmi § 4, imm. 4. Suliassaqarfimmik tigusineq piviusunngortinneqassaaq Inatsisartut inatsisissaannik aalajangersaanikkut.

Naalakkersuisut Inatsisartut 2001-imi ukiakkut ataatsimiinneranni tunngaviumik atuarfiit namminersortitat angerlarsimaffimmilu atuartitaaneq il.il pillugit inatsisartut inatsisissaattut siunnersuut nassiuppaat. Siunnersuut 2001-imi ukiakkut ataatsimiinnermi siullermeerneqarpoq, aammalu aappassaaneerneqarnissaa pingajussaaneerneqarnissaalu 2002-mi upernaakkut ataatsimiinnissamut kinguartinneqarpoq. Inatsisartullu Kultureqarnermut Ilinniartitaanermullu Ataatsimiititaliaannit kissaatigineqarmat aappassaaneerneqarnissaa pingajussaaneerneqarnissaalu 2002-mi ukiakkut ataatsimiinnissamut kinguartinneqarpoq. Tamatuma kingorna Naalakkersuisut Inatsisartut Siulittaasoqarfiannut nalunaaruteqarput, naalakkersuisut siunnersuut utertikkaat 2002-mi ukiakkut ataatsimiinnermi siunnersuummik nutaamik saqqummiussinissaq siunertaralugu.

Siunnersuut maanna saqqummiunneqartoq siornatigut siunnersuummik saqqummiunneqartumik tunngaveqarpoq. Siunnersuummi § 16-imi ingerlatsinerneqarpoq tapiissutit annertussusiat allanngortinneqarsimapput, aammalu § 18, imm. 2-mi atuarfiup illutaasa sanaartorerinut tapiissutit taarsigassarsiallu aammalu § 19, imm. 1-imi oqaaseqatigiinni kingullerni tapiiffigineqarsinnaatitaanerup annaaneqarnera allanngortinneqarlutik. Taakku pillugit aalajangersakkani nassuiaatit innersuussutigineqarput.

Tamatuma saniatigut §16, immik. 2 erseqqissarneqarsimavoq atuartunik annertusisamik immikkut atuartinneqarnissamik allatullu perorsaanermut aamma tarnit pissusaannut tunngatillugu ikiorsertariaqartunut aningaasartuutit Naalakkersuisut utertillugit akilissagaat soorlu utertitsilluni akiliutit meeqqat atuarfianni atuartut pillugit kommuninut utertitsilluni akiliisarneq pillugu maleruagassat malillugit pisartooq.

Siunnersuutip siunertaa:

Siunnersuummi siunertaavoq meeqqat atuarfiannut pisortanit ingerlanneqartumut taarsiullugu periarfissatut tunngaviusumik atuarfiit namminersortut angerlarsimaffimmilu atuartitaaneq pillugit inatsisitigut tunngavissanik pilersitsinissaq, taassuma ataaniilluni tunngaviusumik atuarfinnik meeqqat atuarfiata avataaniittunik pisortat qanoq annertutigisumik qanorlu pissusilimmik tapiisarnissaannut tunngavissanik aalajangersaaneq.

Siunnersuutip imaa:

Siunnersuut danskit inatsisaat (atuarfiit namminersortut aamma tunngaviusumik atuarfiit namminersortut il.il. pillugit inatsimmik nalunaarut nr. 529, 6. juni 2001-imeersoq, kingusinnerpaamik allannngortinneqartoq inatsisikkut nr. 413-, 6. juni 2002-meersukkut) aallaavigalugu ilusilersugaavoq. Siunnersuutip imarisaa meeqqat atuarfiat pillugu Inatsisartut peqqussutissaannut nr. 8-mut, 21. Maj 2002-meersumut ataqatigiissaarneqarpoq. Siunnersuut imatut ilusilersugaavoq:

Kapitali 1: Atuartitaaneq il.il.

Kapitali 2: Tunngaviusumik atuarfiit namminersortitat, aqutsisut atuartitsisullu.

Kapitali 3: Nakkutilliineq.

Kapitali 4: Tapiiffigineqarnissamut piumasaqaatit tapiissutillu atornerqarneri.

Kapitali 5: Tapiissuteqariaatsit tapiissutinillu naatsorsuineq.

Kapitali 6: Tapiiffigineqarnissamut qinnuteqaatit, tapiissutit tunniunneqarneri, naatsorsuutit kukkuneruinerlu.

Kapitali 7: Tunngaviusumik atuarfiit namminersortitat ingerlatsinermut tapiissutinik pineq ajortut.

Kapitali 8: Angerlarsimaffimmi il.il. atuartitaaneq.

Kapitali 9: Angajoqqaat pisinnaatitaaffii pisussaaffiilu.

Kapitali 10: Atortuulersitsineq.

Kapitali 1-imi aalajangersarneqarput tunngaviusumik atuarfinni namminersortitani atuartitaanermi tunngaviit minnerpaaffissarititaat. Imarisaa Kalaallit Nunaanni pissutsit immikkut ittut malitsigisaannik allannguuteqartinneqartoq, tunngaviusumik atuarfiit namminersortut pillugit danskit inatsisaanni kapitali 1-ip imarisaanut naapertuuppoq. Kalaallit Nunaanni pissutsit immikkut ittut allaassuteqartitsisut tassaapput meeqqat atuarfiat pillugu Inatsisartut peqqussutaanni nr. 8-mi, 21. maj 2002-meersumi aalajangersarneqarsimasut, qaffasissutsinut immikkoortiterineq, nalilersuisarnermik aalajangersakkat, oqaatsit atuartitsissutaasut pillugit aalajangersakkat, immikkut atuartitsineq pillugu aalajangersakkat immikkut ittut, tapiliussamik atuartitsineq aammalu oqaatsit ilitsoqqussaralugit pigisat atuartitsissutaanerat, perorsaanermut aamma tarnip pissusaanut siunnersuineq pillugit aalajangersakkat aammalu ukiup atuarfusup sivisussusianut tunngasut.

Kapitali 2-mi aalajangersaavigineqarput atuarfiit aqunneqarnerat, taakku pisortaqaarnerat aammalu pisortat atuartitsisullu akissarsiatigut atorfeqartitaanermilu

atugarisaat. Aalajangersakkat taakku aamma aalajangersaavigineqarput danskit inatsisaanni aalajangersakkat assingusut aallaavigalugit. Maleruagassanut taakkununga tunngatillugu pisariaqartutut isigineqanngilaq kikkut atuarfiup siulersuisuinut ilaasortaasinnaanersut immikkut maleruagassiussallugu. Taamaattumik suliami atuumassuteqarneq pissutigalugu peqataasinnaannginneq pillugu maleruagassat nalinginnaasut matumani aalajangiisuusartussaassapput. Aammattaaq danskit malittarisassaanni atuartsinermi oqaatsit atorneqartut allattariarsorluni oqalullunilu pisortamit piginnaaneqarfigineqarnissaat pillugu erseqqissaanissaq pisariaqarsorinartinneqarsimangilaq.

Kapitali 3 danskit inatsisaanni maleruagassanut assingusunik tunngaveqarpoq. 2002-mi junimi danskit inatsisaanni allannguisoqarneratigut (inatsit nr. 413, 6. juni 2002-meersoq) nakkutiginninneq sukannernerulersinneqarpoq, Kalaallit Nunaanni pisariaqarsorinangitsumik. Taamaattumik aalajangersakkat maleruagassat Danmarkimi inatsisip allanngunnginnerani atuuttut aallaavigalugit oqaasertalerneqarput.

Kapitali 3-p imarisaa danskit inatsisaanni kapitalimut ataatsimut isigalugu assingusorujussuuvoq. Allannguutituaasoq tassaavoq § 11-mi aalajangersagaq, tassani aalajangersarneqarluni tunngaviumik atuarfiup namminersortitap kommunalbestyrelsi noqqaaffigisinnaagaa najugarfittut immikkoortortaq nakkutigeqqullugu, tassa atuarfiup ingerlataasa ilaa atuartsinermut tunngasuunngitsoq. Danskit inatsisaanni nakkutiginninneq noqqaassuteqarnikkut atuartitaanermut ministeriaqarfimmit isumagineqarsinnaavoq.

Kapitali 4-mi aamma 5-imi tappiissuteqartarneq pillugu aalajangersakkat danskit aalajangersagaannit allaanerungaatsiarput, tassani pissutaanerpaajulluni kissaatigineqarmat tapiissuteqariaaseq danskit aalajangersagaannit pisariinnerujussuussasoq.

Kapitali 4-mi tapiiffigineqarnissamut piumasaqaatit aamma tapiissutit atorneqarneri pillugit tunngavissat aalajangersaavigineqarput. Danskit maleruagassaannit allaassutigaat siunnersuutigineqarmat kommunimi atuarfiup ingerlatsivigisaani kommunalbestyrelsip ingerlatsinermut tapiissuteqartarnissaa, danskit aalajangersagaanni naalagaaffik tapiissuteqartinneqartaraluartoq. Tamatumunnga pissutigineqarpoq kommunit ataatsimoortumik tapiissutinik Namminersornerullutik Oqartussanit pisarmata, ilaatigut atuarfiit ingerlanneqarnerinut atugassanik. Taamaaliornikkut ataatsimoortumik tapiissutit atuartut ataasiakkaat malillugit ingerlasassapput.

Siunnersuutigineqarportaaq Danmarkimisut kommunalbestyrelsi nammineq akiliutit apparsaavigineqarnissaannut tapiissuteqarsinnaassasoq, matumani aamma atuartut najugaqarfiannut akiliutit, angallassinermut aningaasartuutit ilanngullugit kiisalu atuarfiit illutaasa sananerinut aamma aningaasaliissutinut taakkununga assingusunut aningaasartuutinut tapiissuteqartarlunilu taarsigassarsisitsillunilu.

Siunnersuummi matumani siunnersuutigineqanngilaq atuartunik allatut oqaaseqartunik immikkut ikiorsiissutitut atuartitsinermut kommunalbestyrelsip tapiissuteqarsinnaanera.

Tapiissutit atorneqarneri pillugit danskit maleruagassaannut paarlangasumik pisariaqartinneqan-ngilaq aningaasat atoriaannaat tunngaviusumik atuarfimmit namminersortitamit pigineqartut qanoq inissinneqassanersut pillugu maleruagassanik aalajangersaasoqarnissaa, taamaallaalli pingaarnersutigit aalajangersarneqarluni atuarfiup aningaasaatai sapinngisamik atuarfimmu iluaqutaanerpaasussanngorlugit aqunneqassasut tamatumalu saniatigit Naalakkersuisut tunngavissalernerqarput aningaasat atoriaannaat atuarfiup ingerlanneqarneranut atussallugit pisariaqartinneqanngitsut inissinneqartarnissaat pillugu malittarisassiornissamik.

Kapitali 5-imi tapiissuteqariaatsit taakkualu naatsorsorneqartarnissaat aalajangersaavigineqarpoq. Soorlu tassani takuneqarsinnaasoq tapiissuteqariaaseq ataasiinnaq tassani pineqarpoq, tassalu meeqqat atuartut ataasiakkaat tunngavigalugit ingerlatsinermut ukiumoortumik tapiissutissaq. Taamaaliornikkut danskit malittarisassaannut naleqqiullugu malunnarluartumik pisariillisaaneqarpoq, tassani nalinginnaasumik ingerlatsinermut tapiissutit saniatigit atuarfiit illutaannut immikkut tapiissuteqartoqartarpoq, atuarfimmu najugaqarfiusunut immikkut tapiissuteqartoqartarluni, tyskit ikinnerussuteqartut atuarfiutaannut immikkut tapiissuteqartoqartarluni, atuareernermi atuartunik paarsinermut aaqquissuussinermut immikkut tapiissuteqartoqartarluni, ilinniartitsisut sulinerannut saniatigit aningaasartuutaasartut matussuserneqartarnerannut immikkut tapiissuteqartoqartarluni, atuartut annertuumik innarluuteqartut atortussaannut angallanneqartarnerinullu tapiissuteqartoqartarluni, kiisalu atuarfimmu akiliummut apparsaassutissanik tapiissuteqartoqartarluni, kiisalu atuartut najugaqarfianni najugaqarnermut akiliummut apparsaatissanik tapiissuteqartoqartarluni aamma angallassinermut tapiissuteqartoqartarluni.

Tapiissuteqariaatsit tamakku siunnersuummut ilanngunneqannginnerannut pissutaatinneqarpoq tunngaviusumik atuarfimmu namminersortitanut ingerlatsinermut tapiissutit meeqqat atuarfianni atuartumut ataatsimut Namminersornerullutik Oqartussanit kommuninut ataatsimoortumik tapiissutaasartut tamakkiisut angeqqatigissammattigit. Tamatuma saniatigit tapiissuteqariaaseq paasiuminartoq aammalu allaffissornikkut pisariitsoq anguniarneqarpoq.

Namminersornerullutik Oqartussat kommuninut atuarfeqarfimmu tunngatillugit ukiumut ataatsimut tapiissutigisaat 2002-imi 319 mio. kr.-iupput, taakkunannga 116 mio. kr.-it nunaqarfinni atuartunut agguagassaallutik, 203 mio. kr.-illu illoqarfinni atuartunut agguagassaallutik. Ataatsimoortumik tapiissutit agguanneqartarneranni nunaqarfinni atuartunut ataatsimoortumik tapiissutit marloriaammik annertussuseqartitaasarput. Nunaqarfinni atuartut 6-nniit 17-inut ukiullit katillutik 2.631-upput, illoqarfinnilu atuartut 6-niit 17-inut ukioqartut 9.138-iullutik. Ataatsimoortumik tapiissutit katillutik nunaqarfimmi atuartumut ataatsimut 44.090 kr.-iupput, illoqarfimmili atuartumut ataatsimut 22.215 kr.-iullutik. Taamaallutik kommunit tunngaviusumik atuarfimmu namminersortitamut tapiissutissaat atuartumut ataatsimut 22.215 kr.-iupput. Siunnersuummi § 16 malillugu

kommunalbestyrelsip tunngaviusumik atuarfik namminersortitaq atuarp
atuarfissatut allassimaffigisaa atuartunut arfinilinniit 17-inut ukiulinnut tamanut
ukiumut ingerlatsinermut tapiissuteqarfigissavaa. Atuartumut ataatsimut tapiissutit
Namminersornerullutik Oqartussat illoqarfinni atuartumut ataatsimut kommuuninut
ataatsimoortumik tapiissutaasa assigaat. Tamanna siusinnerusukkut siunnersuummut
sanilliullugu allangortinneqarpoq, tassani tapiissutit illoqarfimmi nunaqarfimmilu
atuartumut tapiissutit oqimaaqatigiissinnerisigut
agguaqatigiissinneqarsimagaluarlutik. § 16-inut nassuiaatit innersuussutigineqarput.

Kapitali 6-imi aalajangersaavigineqarput tapiiffigineqarnissamut qinnuteqartarnissat,
tapiissutit tunniunneqarneri, naatsorsuutit kukkunersiunerlu. Naatsorsuutit
kukkunersiunerlu pillugit aalajangersakkat danskit aalajangersagaat assigaat,
taamaallaat allaassutigalugu pisariaqartutut isigineqanngimmat suliami
attuumassuteqarneq pissutigalugu peqataasinnaannginnermut tunngatillugu
kukkunersiuisut pillugit immikkut piumasaqaateqartarnissamik
aalajangersaasoqarnissaa. Taamatuttaaq pisariaqartutut isigineqanngilaq
siulersuisunut ilaasortat namminneq suliami attuummassuteqarneq pissutigalugu
peqataasinnaannginnerminnut tunngatillugu ilumoorluinnarnerminnik
nalunaaruteqartarnissaq pillugu aalajangersakkatigut pisussaaffiliinissaq. Tapiissutit
tunniunneqartarneri pillugit aalajangersakkat danskit malittarisassaannit
allaanerungaatsiarput, tapiissuteqariaatsit annertuumik assigiinngissuteqarnerat
pissutigalugu, tak. tamanna pillugu nassuiaatit qulaani allassimasut. Pitsaanerusutut
isigineqarpoq ingerlatsinermut tapiissutinik, ingerlatsinermut siumoortumik
tapiissutaagallartussanik qinnuteqaatip kingusinnerpaamik tunniunneqarfissaanik
aamma qinnuteqaatit tiguneqartut kommunalbestyrelsimit aalajangiiffigineqarnissaat
tapiissutissallu tunniunneqartarnissaat pillugit piffissalersuilluni aalajangersaanissaq.

Kapitali 7-imi aalajangersaavigineqarput Inatsisartut inatsisaanni maleruagassat
naapertorlugit tunngaviusumik atuarfiit namminersortitat ingerlatsinermut
tapiissuteqarfigineqarneq ajortut. Tamatuma malitsigisaanik atuartitaanermi,
atuarfiup aqunneqarnerani, matumani aamma kommunalbestyrelsimut
nalunaaruteqartarnissamik pisussaaffeqarneq ilanngullugit, nakkutilliinermi,
angajoqqaat pisinnaatitaaffii pisussaaffiilu pillugit kiisalu kommunalbestyrelsip
peqqussuteqartarnissamut periarfissaqarnissaanut taamatullu
naatsorsueqqissaarnermut tunngatillugu paasissutissanik piniartarnissaanut
tunngasunut Inatsisartut inatsisaanni tunngavissatut maleruagassanut atuarfiit
taamaattut aamma malinnittussaapput. Taamaattorli tunngaviusumik atuarfiit
namminersortitat taamaattut atuarfiit aqunneqarnerat pillugu malittarisassanut
qilersorsimanngillat aamma ilinniartitsisut akissarsiatigut atorfeqartitaanikkullu
atugassarisaannut tunngasunut, soorunami aamma tapiissutit pillugit
malittarisassanut qilersorsimanngillat, nammineerluni akiliutit
apparsaavigineqarnissaannut aamma angalassinernut tunngaviusumik atuarfinnut
namminersortitanut taamaattunut aammattaaq kommunit tapiissuteqartarsinnaanerat
eqqaassanngikkaanni, kiisalu kommunit atuarfiit illutaasa sanaartorneqarnerinut
aamma assingusunut aningaasaliissutinut aningaasartuutinut tapiissuteqarsinnaanerat
imaluunniit taarsigassarsititsisinnaanerat eqqaassanngikkaanni. Maleruagassat
taakku danskit maleruagassaat ataatsimut isigalugu assigiinnangajappaat.

Kapitali 8-mi aalajangersaavigineqarpoq angerlarsimaffimmi il.il. atuartitsineq. Aalajangersakkat taakku danskit aalajangersagaannut assingungajapput, taamaallaat allaassutigalugit pissutsit Kalaallit Nunaannut tunngassuteqartut immikkut ittut aallaavigalugit allannguutigitinneqartut.

Kapitali 9-mi aalajangersaavigineqarput angajoqqaat pisinnaatitaaffii pisussaaffiilu, taakku atuarfik pillugu Inatsisartut peqqussutaanni nr. 8-mi, 22. maj 2002-meersumi § 29-imi aalaja-ngersakkanut naapertuupput.

Naggasiullugu kapitali 10-mi atuutilersitsinissamut aalajangersakkat aalajangersaavigineqarput. Tassani takuneqarsinnaavoq Inatsisartut inatsisaata 1. juni 2003-mi atuutilersinneqarnissaa siunnersuutigineqartoq.

Tusarniaaneq:

Piffissami 8. juli 2002-mit 5. august 2002-mut peqqussutissatut siunnersuut ukununga tusarniaassutigineqarpoq: KANUKOKA, IMAK, KIK, Undervisningsministeriet, Statsministeriet, Nuuk Internationale Friskole (NIF), Aningaasaqarnermut Pisortaqarfik (Aningaasaqarnermik Pilersaarusiortarfik aamma Isumaqatigiinniartarnermut Immikkoortortaq), Aqutsinermut Pisortaqarfik, Isumaginninnermut Suliffeqarnermullu Pisortaqarfik kiisalu Naalakkersuisut Allattoqarfianni Inatsisileriffik. Aammattaaq illuatungeriinnut taakkununga siunnersuut 2001-imi inatsisartut ukiakkut ataatsimiinneranni saqqummiunneqartoq aammalu siunnersuummut matumunnga aallaavioq tusarniaassutigineqarsimavoq. Piffissaq tusarniaaffigineqartoq tassaavoq 3. - 4. september 2001.

2001-imi ukiakkut Statsministeriaqarfik aamma Undervisningsministeriaqarfik kiisalu KANUKOKA, NIF aamma Aningaqaqarnermut Pisortaqarfik ataatsimeeqatigineqartarput.

2001-imi ukiakkut tusarniaanermi oqaaseqaatit makku tiguneqarput, siunnersuummi matumani ilanngunneqanngitsut.

KANUKOKA-p § 18, imm. 1-imut (maanna § 16, imm. 1) oqaatigaa ikaarsaarialernermi aaqqissuussisoqassasoq, tamatumani kommuni atuartunut ukioqatigiiaanut taamaallaat tapiisussaataalluni aammalu kommuni tamatumani klassinik ilusilersuinermissaminut periarfissaqassasoq kommunimi meeqqat atuarfianni tunngaviumik atuarfiup namminersortitap pilersinneqarnerata kingunerisaanik atuartut ikileriarnissaat iluaqutiginiassaguniuk. Tamanna pillugu aammattaaq taaneqarpoq: "Peqqussutikkut atuuttukku atualeqqaani tunngaviumillu atuarfimmi klassit ilusilersorneqassapput atuartut 1. klassimi atualerneranni. Klassit taakkua sapinngisamik 9. klasse ilanngullugu taakkujuarlutik ingerlaannassapput. Taavalu 10. klassimi aallartinnermi klassit ilusilersornerat nutaaq pissalluni, tamatumani atuartut nalinginnaasumik annertusisamillu atuartitsinermut avinneqassallutik. Meeqqat atuarfiat pillugu peqqussut nutaaq atuutilerpat taamaallaat atuartut atualerneranni klassinik ilusilersuineq pisassaaq, tamatuma kingorna klassit taakkua 10. klassit ilanngullugit

atuarnerup ingerlanera tamaat taakkujuarlutik ingerlassallutik. Meeqqat atuariannut peqqussut nutaaq aammalu tunngaviusumik atuariit namminersortitat pillugit inatsisartut inatsisaat nutaaq 1. august 2002-mi atuutlerpata piffissami ikaarsaariarfiusumi nalinginnaasumik atuartunut ukioqatigiiaanut ukununnga kommunikuutaartumik tapiissuteqartoqarsinnaassaaq, tunngaviusumik atuariup namminersortitap atuartunut ukioqatigiiaanut tamanut atuartitsinissaq neqeroorutigissappagu:

Ukioq atuariusoq 2002/03: Atuaqatigiiaat 1. + atuaqatigiiaat 10.
Ukioq atuariusoq 2003/04: Atuaqatigiiaat 1.-2. + atuaqatigiiaat 10.-11.
Ukioq atuariusoq 2004/05: Atuaqatigiiaat 1.-3. + atuaqatigiiaat 10.-11.
Ukioq atuariusoq 2005/06: Atuaqatigiiaat 1.-4. + atuaqatigiiaat 10.-11.
Ukioq atuariusoq 2006/07: Atuaqatigiiaat 1.-5. + atuaqatigiiaat 11.
Ukioq atuariusoq 2007/08: Atuaqatigiiaat 1.-6.
Ukioq atuariusoq 2008/09: Atuaqatigiiaat 1.-7.
Ukioq atuariusoq 2009/10: Atuaqatigiiaat 1.-8.
Ukioq atuariusoq 2010/11: Atuaqatigiiaat 1.-9.

Tamatuma kingorna: Atuaqatigiiaat tamarmik

Tunngaviusumik atuariit namminersortitat kingusinnerusukkut atulersinneqassappata ikaarsaariarnermi aqqissuussineq taamaaqataanik kinguartinneqassaaq. Tunngaviusumik atuariup namminersortitap nalunaarutigineqarneratigut Naalakkersuisut kommunimilu tunngaviusumik atuariup namminersortup inissisimaffigisaani kommunalbestyrelsip isumaqatigiissutigissavaat, ikaarsaariarnermi aqqissuussinissami piffissaq aalajangersimasooq atuartut ukioqatigiiaat qassit atuariup atuartitsinikkut neqerooruteqarfigissagai.

Piffissami ikaarsaariarfiusumi aningaasartuuteqarnerunerq, inatsisiliap matuma kinguneranik takkuttussaq Namminersornerullutik Oqartussat akilertariaqarpaat. Namminersornerullutik Oqartussat piffissami ikaarsaariarfiusumi tunngaviusumik atuariit namminersortitamut ukioqatigiiaanut kommunip tapiiffiginngisaanut § 18, imm. 1-imi (maanna § 16, imm. 1) taaneqartumut tapiissutaasariaqassapput.

Naalakkersuisut KANUKOKA-p ikaarsaariarnermi aqqissuussinissamik kissaateqarnera malissimangilaat, tamanna tunngavissaqarsorinnginnamikku. Taamaalilluni meeqqat atuariat pillugu Inatsisartut peqqussutaanni atuuttumi kommunit atuarnerup ingerlanerani atuartut tunngavigalugit klassinik allatut ilusilersuinissaat akornutissaqartinneqanngilaq. KANUKOKA-p tusarniaanermi nassuiaatai allat immikkut oqaaseqaatissiinngillat.

Nuuk Internationale Friskolip (NIF) tusarniaanermi akissuteqaammini oqaatigaa isumaqarluni inatsisissatut siunnersuut tunngavissarititigut amigaateqartoq naleqqutinngitsortaqaartorlu, kingunerissallugulu inatsisip tunngaviusumik atuariit namminersortitat pilersinneqarneranni pissusiviit eqqarsaatigalugit tunngavilersuutaasinnaannginnera, pissutigalugu Nunatsinni tunngaviusumik

atuarfik namminersortitaq aningaasatigut atugassarititaasussat taamaattut malillugit ingerlanneqarsinnaanngimmat.

Ajornartorsiut annertunerpaaq ersersinneqartoq tassaavoq atuarfiup illutaasa sulisunullu inissiat aningaasalersorneqarnissaat. Sulisunut inissiat eqqarsaatigalugit allaffissornerup aningaasaqarnerullu kingunerisassai pillugit nassuiaatit takoqquneqarput.

Siunnersuummi matumani § 18-imi, imm. 2-mi aalajangersarneqarpoq atuarfiup illutaasa sanaartornerinut assigisaannullu aningaasaliissutinut kommunalbestyrelsit tunngaviusumik atuarfimmuut namminersortitamut aningaasanik tapiissuteqarsinnaallutillu taarsigassarsisitsinnaasut. NIF isumaqarpoq, tunngaviusumik atuarfiit namminersortitat sulisunut inissialiornissamut atuarfiullu illutaanik sananissamut taarsigassarsisinneqarsinnaanissaminnut inatsisitigut piomasqaateqartassasut. NIF-ip kissaatigaa, tunngaviusumik atuarfiit namminersortitat "10/40/50-imi aqqissuussineq" malillugu imaluunniit Illuliortiternermut aningaasalersuineq pillugu Inatsisartut peqqussutaat nr. 4, 13. oktober 1998-imeersoq imaluunniit aqqissuussineq alla ilanngunneqassasoq, tassalu tunngaviusumik atuarfinnut namminersortitanut sanatitsinermi akiusup 60 %-ianik ernialiuussassat ilanngullugit aammalu ukiuni 15-ini taarsersugassaanngitsumik, tamatumalu kingorna akilerneqartussanik, taarsigassarsinissamik periarfissiisussaq.

Aalajangersagaq tunngaviusumik atuarfinnut namminersortitanut taarsigassarsisitsisinnaanissamik periarfissiisoq ilanngunneqarpat, inatsisissatut siunnersuut Nunatta karsianut aningaasartuuteqarnerulernermik kinguneqassaaq. Inatsisissatut siunnersuummut siusinnerusukku saqqummiunneqartumut sanilliullugu siunnersuummi matumani atuarfiit illutaannik sanaartornissamut kiisalu aningaasalersuinermi aningaasartuutinut assigisaannut Namminersornerullutik Oqartussanit taarsigassarsinissamut tapiiffigineqarnissamullu periarfissiisoqanngilaq. Tamatumunnga peqqutaavoq tunngaviusumik atuarfiit namminersortitat Namminersornerullutik Oqartussanit taarsigassarsinissamut tapiiffigineqarnissamullu piviusorsiuunngitsumik naatsorsuuteqartitsilernissaat Naalakkersuisut kissaatiginngimmassuk, Namminersornerullutik Oqartussat pisussaaffigissammassuk illutanik ullumikkumut naleqquttunik naammattunik meeqqat atuarfianni atugassanik qulakkeerinissaq.

Illuliortiternermut aningaasalersuisarneq pillugu Inatsisartut peqqussutaata allanngortinneqarneranik Inatsisartut peqqussutaanni nr. 1-imi, 21. maj 2002-meersumi inatsisartut peqqussutaata atuuffissaa annertusineqarpoq, tunngaviusumik atuarfiit namminersortitat namminneq angerlarsimaffimmini atuartitsineramik ingerlataqartut inatsisartut peqqussutaanni maleruaqqusat malillugit taarsigassarsianik qinnuteqarsinnaalersillugit. Taamaattorli sulisorisanut inissianik sananermut taamaallaat taarsigassarsianik qinnuteqartoqarsinnaassaaq, tassalu ininut atuartitsivinnut il.il. pinnani.

Oqaaseqaatit piffissami tusarniaaffiusumi 8. juli - 5. august 2002-mi tiguneqartut:

Tusarniaaffigineqartunit ukunannga akissutit tiguneqarput: Kalaallit Nunaanni Sulisitsisut Peqatigiiffiat, KANUKOKA, IMAK, Statsministeriaqarfik, Undervisningsministeriaqarfik, Isumaginninnermut Suliffeqarnermullu Pisortaqarfik, Aningaasaqarnermut Pisortaqarfik, Aqutsinnermut Pisortaqarfik.

Tusarniaanermut akissutini oqaatigineqartut inatsisinillu misissuineq tunngavigalugit siunnersuummi annikitsuinnarnik erseqqissaasoqarpoq (§ 6, imm. 5-imi § 8-milu) aammalu siunnersuummi nassuiaatini annikitsuinnarnik erseqqissaasoqarluni. Matumani tusarniaanermut akissutinit oqaatigineqartut pingaarnerit nassuiaatigineqassapput.

KANUKOKA-p tusarniaanermut akissutit siusinnerusukkut nassiunneqartut innersuussutigai. Aammattaaq KANUKOKA isumaqarpoq Naalakkersuisut matuminnga siunnersuuteqarnermikkut tunngaviusumik atuarfinnik namminersortitanik pilersitsinissamut periarfissat ima ajorseriartitsigissagaat, taamaattut pilersinneqarnissaat naatsorsuutigineqarsinnaassanani.

Naalakkersuisut isummamut tassunga isumaqataannngillat. Ilumoorpoq tapiissutit maanna siunnersuutaasumi ikinnerummata, aalajangersakkanulli ukununnga nassuiaatini soorlu nassuiaatigineqartut tamatumunnga piviusunik tunngavissaqarpoq.

Aammattaaq KANUKOKA-p oqaatigaa Naalakkersuisut siunnersuummi § 18-ip allanngortinneqarnissaanik siunnersuuteqarnermikkut atuarfiit illutaanik aningaasalersueqataasinnaanermut imminnut pisussaaffiartut. Tamanna Kattuffimmit ima paasineqarpoq Naalakkersuisut taarsigassarsitsisarnertit tapiissuteqartarnerillu kommunitut tunniukkusukkaat, uffa taakku maanna nammatassat suliassallu agguataarneqarnerat pissutigalugu atuarfinnik sanaartornissamut aningaasalersuinissaminnut aningaasassaqaanngitsut.

Naalakkersuisut tunngaviusumik isumaqarput tunngaviusumik atuarfinnik namminersortitanik sanaartorneq pisortanit aningaasalersorneqassanngitsoq.

NIF-ip oqaatigaa, tapiissut pisortanit pissarsiarineqarsinnaanngippat angajoqqaat siulliullutik aningaasalersuisussaasut. Pisortat tapiissutaasa 4.000 kr.-inik annikillisinneqarneratigut, angajoqqaat namminneq akiligassaat 4.000 kr.-inik amerlissapput.

NIF isumaqarpoq, angajoqqaat perorsaanermik atuartitseriaatsimillu allamik toqqaanermik kingunerisaannik aningaasartuuteqarnerunerit akilertariaqaraat - matumani ukiumi ataatsimi atuartumut ataatsimut 7.000 kr.-it pineqarlutik - inatsisissatut siunnersuummi oqaatigineqartut 21.000 kr.-iunatik.

Naalakkersuisut isumaqatigaat maanna siunnersuummi tapiissutit ikilisasut, aalajangersakkanulli taakkununnga nassuiaatini nassuiaatigineqartut tamatumunnga pissutissaqarpoq.

Aammattaaq NIF-ip oqaatigaa, maanna siunnersuummi meeqqat atuarfiat assigalugu atuarfiup illutai akeqanngitsumik atugassanngortinneqassanngitsut. NIF-ip siunnersuutigaa, assersuutigalugu 10 - 40 -50-imik aaqqissuussineq atuarfiup illutaanut atatillugu tunngaviusumik atuarfinnut namminersortitanut atugassanngortinneqassasoq.

Naalackersuisut tunngaviusumik isumaqarput tunngaviusumik atuarfiit namminersortitat atuarfinnik sanaartornerat pisortanit aningaasalersorneqassanngitsaq.

NIF-ip oqaatigaa, atuarfimmik aallartitsisoqarusunngitsaq angajoqqaat atuatumut ataatsimut qaammamut 4.400 kr.-inik akilersuiffissaannik. NIF isumaqarpoq, inatsisissatut siunnersuut atuarfinnik namminersortitunik imaluunniit tunngaviusumik atuarfinnik namminersortitanik pilersitsinissamut periarfissiinngitsaq.

Naalackersuisut tamatumunnga isumaqataanngillat.

IMAK-ip oqaatigaa naatsorsuutigalugu tunngaviusumik atuarfinni namminersortitani atuartsinermut minnerpaamik piunasaqaataassasut meeqqat atuarfiannut piunasaqaatinut naapertuutissasut. Taamaattumik IMAK isumaqarpoq meeqqat atuarfianni ilinniakkatigut piunasaqaatit assingi pisortanut atuartsisunullu piunasaqaataassasut, t.i. taakku ilinniartitsisunngorniarfimmilinniartitsisutut ilinniartitaanermik naammassinnissimasasut. Naalackersuisut tamatumunnga isumaqataanngillat. Ilumoorpoq tunngaviusumik atuarfimmilinniartitsisutut atuartsisunullu meeqqat atuarfianni nalinginnaasumik piunasaqaatinut nalimmattuusussaasoq, tak. siunnersuummi § 1. Taamaakkaluartoq Naalackersuisut naliliipput, angusat aalajangiisuussasut sakkussat pinnatik, - matumani pineqarlutik pisortat atuartsisunullu. § 1-imi piunasaqaat naammassineqarsimappat apequtaassanngilaq pisortaq atuartsisunulluunniit ilinniakkatigut aalajangersimasumik piginnaaneqarnersut.

IMAK-ip kaammattuutigaa siunnersuummi § 8 peerneqassasoq, tassani oqaatigineqarluni inatsisitigut aalajangersagaq taamatut imalik pituttorsimanngitsumik isumaqatiginninniarsinnaanernut inatsisitigut tunngavilimmik killiliissasoq. Naalackersuisut tamatumunnga atatillugu oqaatigissavaat, isumaqatiginninniarsinnaanernut killissanik aalajangersaanissamut tunngaviatigut akornutissaqanngitsaq. Tamatumani tunngavigineqarpoq tunngaviusumik atuarfinni namminersortitani atuartsisunut pisortanullu akissarsiatigut atorfinitsinneqarnikkullu atugassarititaasut meeqqat atuarfianni pisortat neqeroorutigisinnaasaannit pitsaanerusumik neqeroorfigineqannginnissaannik qulakkeerinnikkusunneq. Taamaanngippat tamanna nunatsinni meeqqat atuarfianni sulisussarsiornermik sulisullu atatiinnarnissaannut periarfissat suli ajornerulissapput. Aammattaaq oqaatigineqassaaq aalajangersakkap maanna oqaasertai ilusilerneqarmata KIIP-ip, Aqutsinermut Pisortaqarfiup NIF-illu akornanni isumasioqatigiinnikkut.

Kiisalu IMAK-ip oqaatigaa, eqqarsarnartoqartoq siunnersuutip kingunerisassaaniq tunngaviusumik atuarfiit namminersortitat annertuumik namminneq akiliisartut

meeqqanut ilaqutariinnit akissaqarnerusuneersunut sammitinneqarnerunissaat siunnersuummut siullermut sanilliullugu annertunerusumik, taamaalillunilu meeqqat atuarfiannik imaluunniit tunngaviusumik atuarfinnik namminersortitanik toqqaaneq malillugu ilaqutariinnik meerartalinnik inuuniarnikkut assigiinnngisitseqataalissutaasumik. Tamatumunnga atatillugu oqaatigineqassaaq naalaakkersuisut siunnersuummik suliarinninnermi aallaavigimmassuk Namminersornerullutik Oqartussat kommunillu aningaasartuuteqannginnissaat, taamaattumillu nunatsinni pilersitsiniarnermi aningaasartuutit annertunerujussuat pissutigalugu nammineq akiligassap annikinnerulersinnissaanut periarfissaqarsimanani. Taamaakkaluartoq siunnersuutikkut kommunit nammineq akiligassap annikillissinnissaanut annertunerusumik tapiissuteqarsinnaanissaannut ammaassisoqarpoq.

Sulisitsisut Peqatigiiffiata tusarniaanermut akissummini oqaatigaa, siunnersuummi maanna nassiunneqartumi tunngaviusumik atuarfiit namminersortitat ingerlannissaannut annertuumik ajornerulersitsisoqartoq, ilaatigut ingerlatsinermut tapiissutit ikilinerisigut aammalu atuarfiit illutaannut Namminersornerullutik Oqartussanit taarsigassarsinnaanerup tapiiffigineqarsinnaanerullu peerneqarnerisigut. Naalakkersuisut tamatumunnga isumaqataannngillat. Ilumoorpoq maanna siunnersuummi tapiissutit ikilineqartut, aalajangersakkanulli taakkununnga nassuiaatini soorlu nassuiaatigineqartoq, tamatumunnga piviusunik tunngavissaqarpoq. Atuarfiit illutaannut taarsigassarsianut tapiissutinullu atatillugu ilumoorpoq siusinnerusukkut siunnersuummi taakkuninnga Namminersornerullutik Oqartussanit taarsigassarsinissamut periarfissaqartoq, kisiannili tamanna periarfissaannaasimavoq, maannakkut aningaasaqarnikkut killissarititat ataanni piviusunngortikkuminnaattusaaq.

Kalaallit Nunaanni Sulisitsisut Peqatigiiffiata aamma ilisimatitsissutigaa aningaasaqarnikkut kingunerisassat nassuiaatigineqarnerannut atatillugu siunnersuummut nalinginnaasumik nassuiaatit siunnersuummilu aalajangersakkanut ataasiakkaanut nassuiaatit akornanni imminnut assortuuttoqarsorinarpoq. Tamanna ilumuunngilaq. Siunnersuummi kommunit atuarfeqarnermi pisussaaffiinit atatillugu aningaasartuuteqartitsinnginnissaq anguniarneqarsimavoq. Taamaalilluni kommunit ataatsimoortumik tapiissutaat atuartup tunngaviusumik atuarfimmut namminersortitamut ikaarsaariarnerani ingiaqatigitinneqassapput. Nassuiaatini oqaatigineqartutut tamanna kommuninut ataasiakkaanut sipaarutaasinnaassaaq, kommunip atuartumut ataatsimut aningaasartuutai ataatsimoortumik tapiissutinit qaffasinnerummata, kommunillu aningaasartuutaanerusut taakku akilernissaannut pisussaaffeqanngimmata. Kommunip sipaarutip taassuma atuartup tunngaviusumik atuarfimmi namminersortitami atuarnerani nammineq akiligassami appartinnissaanut tapiissutitut atussallugu toqqarsinnaavaa.

Sulisitsisut Peqatigiiffiata oqaatigaattaaq, assigiissitsinissamik tunngavik aallavigalugu aamma annertusisamik immikkut ittumik atuartitsineq atuarfiillu illutaat pillugit meeqqat atuarfiannut malittarisassat assingi malillugit aningaasalersorneqartariaqartut. Atuarfiit illutaasa aningaasalersorneqarnera qulaani oqaaseqarfigineqarpoq. Tassunga atatillugu ilanngullugu oqaatigineqassaaq, naalakkersuisut tunngaviatigut isumaqarmata tunngaviusumik atuarfinnik

namminersortitanik sanaartorneq pisortanit aningaasalersorneqassanngitsoq. Annertusisamik immikkut ittumik atuartsinermut atatillugu atuarfiit namminersortitat immikkut ittumik atuartsinermut aningaasartuutaat kommuunit pineqartarnerattulli utertitsinneqarsinnaapput.

Sulisitsisut Peqatigiiffiata naggasiullugu oqaatigaa, peqatigiiffiup nalorninartoqartikkaa siunnersuut saqqummiunneqartoq atorlugu meeqqat atuarfiannut taarsiullugu periarfissamik pilersitsisoqarnissaa, nammineq akiligassaq annertuallaassamat. Nammineq akiligassap annertussusianut ilaatigut pilersitsinermut ingerlatsinermullu aningaasartuutit ilaatigullu tunngaviusumik atuarfiit namminersortitat ingerlatsinermiinnut qanoq annertutigisumik tapiiffigineqarnissaat apeqqutaapput. Taamaattumik tunngaviusumik atuarfinnik namminersortitanik sanaartornissamat periarfissanik pilersitsinissamat aamma apeqqutaassaaq atuarfiup ingerlanneqarneranut kommunit qanoq annertutigisumik tapiissutinik akileeqataassanersut.

Inatsisileriffiup inatsisinut oqaaseqaatai siunnersuummi ilanngunneqarput.

Allaffissornikkut ingerlatsinermut aningaasatigullu kingunerisassai:

Siunnersuut Namminersornerullutik Oqartussanut aningaasatigut sunniuteqassanngilaq, malittarisassiornermut aamma allaffissornikkut ingerlatsinermut aningaasartuutaanerusussat eqqarsaatigissanngikkaanni, massakkut suli aningaasanik immikkoortitsivigineqanngitsut.

Siunnersuutip aningaasatigut allaffissornikkullu kommuninut kingunissaasa qanoq ikkumaarnerinut apeqqutaajumaarpoq kommunini ataasiakkaani tunngaviusumik atuarfinnik namminersortitanik pilersitsisoqartassanersoq aamma atuartut qanoq amerlatigisut (nunaqarfinneersut illoqarfinneersullu) atuarfimmilunni ataatsumi atuartuusalerumaarnersut. Siunnersuut kommuninut aningaasartuutaassanganneqanngilaq, taamaallaat atuartumut ataatsimut aki akilertartussaagamikkut Namminersornerullutik Oqartussanit ataatsimoortumik tapiissutit aqqutigalugit tigusartakkamik annertoqataa. Kommunit atuartumut ataatsimut akilertagaat ataatsimoortumik tapiissutinut annertunerujussuimmat kommunit tunngaviusumik atuarfimmik namminersortitamik pilersitsisut sipaaruteqarsinnaassapput.

Tunngaviusumik atuarfinnut namminersortitanut pilersinneqarumaartussanut siunnersuutip malitsigisussaassavaa atuarfiit tapiiffigineqartarnissaat, Namminersornerullutik Oqartussat kommunini atuartunut 6-17-inik ukiulinnut aningaasartuutigisartagaasa annertoqataannik. Naatsorsuusiat Nuuk International Friskolimit suliarineqartut takutippaat atuartumut ataatsimut siunnersuummi tunngavissiisutiginneqartut naapertorlugit nammineerluni akiliutissat 66.400 kr.-inik annertussuseqassasut. Atuarfiup ingerlanneqarnissaanut aningaasartuutissat saniatigut naatsorsuusiornermi aamma ilanngunneqarput atuarfiliornissamat atuarfimmilunni atorfeqartussanut inissialiornissanut taarsigassarsiasaanut akilersuutissaajumaartut erniaritinneqarumaartullu. Tamakku tunngaviliullugit

nammineerluni akiliutaasartussat atuartumut ataatsimut ukiumut 44.000 kr.-it missaannik amerlassuseqartartussaassapput.

Aningaasaqarnermut Pisorta qarfiup oqaatigaa, sulisorisanut inissialiortoqarnani tunngaviusumik atuarfiit namminersortitat INI-mi inissanik tunineqarsinnaasut. Ineqarnermut, Attaveqarnermut Pilersuinernullu Pisorta qarfimmi, Ineqarnermik aqutsisoqarfiup ilisimatitsissutigaa suliffeqarfiit namminersortut il.il. inissanik INI-mit qinnuteqarsinnaanngitsut. Tamatumali akerlianik suliffeqarfiit namminersortut il.il. Inatsisartut peqqussutaat nr. 1, 21. maj 2002-meersoq tunngavigalugu 10 - 40 - 50-imik aaqqissuussinermik taaneqartoq malillugu sanaartornermut aningaasartuutitut aningaasaliiffiqineqarnissamik qinnuteqarsinnaapput.

Oqaatigineqassaaq siunnersuut kommuninut aningaasaqarnikkut sunniuteqassammat, § 18, imm. 2 naapertorlugu tapiissuteqarnikkut taarsigassarsiniarnikkulluunniit aningaasaliissuteqartoqassappat.

Aalajangersakkanut ataasiakkaanut nassuiaatit

Kapitali 1-imut Atuartitaaneq il.il.

§ 1-imut

Aalajangersakkami aalajangersaavigineqarput tunngavisumik atuarfinni namminersortitani atuartsinerup ingerlanneqarsinnaanissaanut pingaarnerusutigut tunngavissat. Aalajangersakkakut tunngaviusumik atuarfiit namminersortitat piginnaatinnerqarput 1.-10. klassini atuartsinermik neqerooruteqarsinnaanissamut, pisussaaffilerneqarlutillu minnerpaamik meeqqat atuarfianni nalinginnaasumik atuartsinissamik piumasarineqartunut nallersuuttumik. Aalajangersagaq imatut paasineqassaaq tunngaviusumik atuarfiit namminersortut atuartsinissutitut sammisat meeqqat atuarfianni nalinginnaasumik sammisanut agguataarneqarsinnaasutut atuartsinissamik neqerooruteqassasut. Piumasarineqanngilaq meeqqat atuarfianni atuartsinissutitut sammisat tamaasa atuartsinermi atuartsinissutigineqarnissaat.

§ 2-mut

10. klassimi atuartsineq meeqqat atuarfianni naggataarutaasumik naliliinissamut piareersarfiusinnaavoq. Imm. 1-ip imm. 3-mut ataqtigiissinnerata malitsigissavaa

atuarfiup pisortaa Naalakkersuisunit akuerineqaaarluni maleruagassat meeqqat atuarfiannut atuuttut naapertorlugit meeqqat atuarfiata nalilersuisarneratut inaarutaasumik nalilersuinissamut.

Meeqqat atuarfianni inaarutaasumik nalilersuisarnermi ilaavoq atuartunut angajullernut ingerlaavartumik nalilersuisarnerit - tassa 8.-10. klassini - aammalu ilanngunneqartarlutik atuartup atuartitsissutini pisassamini tamani naliliivigineqartarnera. Meeqqat atuarfianni taaguusersuisarnerit malillugit atuartitsissutit pineqartut taassaapput oqaatsit, kulturi aamma inuiaqatigiit, kiisalu matematik aamma pinngortitaq.

Imm. 2-mi aalajangersagaq imm. 1-imi aalajangersakkamut qaqutigoortumik taartaasartussaavoq. Aalajangersakkami siunertaavoq atuartut ukiut qulingiluat atuareersimallutik ilisimasassatigut inuttullu inuusuttuunermi ilinniarnissamut piareersimalersimasut meeqqat atuarfianni inaarutaasumik naliliivigineqarnissamut misilitsinnissamullu qaqugukkulluunniit atuuttumut periarfissinnissaat.

Naalakkersuisut tunngaviusumik atuarfimmi namminersortitami pisortaq meeqqat atuarfianni misilitsinnerit naliliinerillu sukkulluunniit atuuttut ingerlanneqartarnissaannut piginnaatissinnaavaat. Tamatumuuna tunngaviusumik atuarfiit namminersortitat misilitsinnerit/naliliinerit meeqqat atuarfiannut atuuttut atornissaannut periarfissinneqassaaq. Taamaaliornissamulli pisortap malittarisassanik meeqqat atuarfianni sukkulluunniit atuuttunik malinninnissaa piumasaaqataavoq, tamatumani ilanngullugit nakkutilliisoqarnissamut il.il. malittarisassat.

§ 3, imm. 1-imit

Aalajangersakkat atuarfik pillugu Inatsisartut peqqussutaanni nr. 8, 21. maj 2002-meersumi § 8, imm. 1 assigaat. Kalaallisut oqaatsit oqaatsit pingaarnertut inissisimanissaat taamaalilluni meeqqat atuarfiannisut ippoq. Qaffasinnerusumik ilinniartitaanerup ingerlanneqarnissaani atuartut oqaatsinik piginnaasaqartariaqarnerat eqqarsaatigalugu siunertatut naleqquttutut isigineqarpoq meeqqat atuarfianninngaannili oqaatsit arlallit oqaatsit atuartitsissutigineqartussatut ilanngunneqarnissaat.

Imm. 1 malillugu kalaallisut aammalu qallunaatut oqaatsit oqaatsit atuartitsissutitut inissinneqarnissaat qulakkeerisaaq oqaatsit taakku marluk atuartut ilitsoqqussaralugit oqaasiinik aallaveqartumik atorneqarnissaannik. Tamatuma peqatigisaanik oqaatsit marluk atuartitsinermi atorneqarnerisigut atuartut nunat allamiut oqaasiinik ilikkarnissaannut periarfissat pitsaanerulissapput.

Aalajangersakkap kingunerissavaa atuartitsinermi atuartunut tamanut oqaatsit taakku marluk naammaginantumik atorneqarnissaannut pisussaaffiliinissaaq, atuartut oqaatsinik ilikkarnissaat siunertaralugu oqaatsitigut tunuliaqutaasut apeqqutaatinnagit. Taamaattumik siunertarineqanngilaq atuartitsinermi oqaatsit

marluk tamarmiusumik ingerlanneqarnissaat, atuartitsinermili oqaatsinik atuineq atuartunut ataasiakkaanut atuartoqatigiiaanullu oqaatsitigut piumasarineqartunut pisariaqartinneqartunullu naleqqussarneqassalluni.

Aalajangersakkami nunat allamiut oqaasiinik atuartitsinerup oqaatsit pineqartut atorlugit ingerlanneqarnissaa mattunneqanngilaq. Aammattaaq kalaallisut qallunaatullu oqaatsit saniatigut fagini allani allamiut oqaasii atorlugit atuartitsisoqarsinnaavoq, tamanna oqaatsitigut atuartitsinermut atasumik pissappat.

§ 3, imm. 2-mut

Imm. 2 naapertorlugu tuluit oqaasii aamma atuartitsissutitut atorneqarsinnaapput. Siunertaasoq tassani aammattaaq tassaavoq oqaatsinik taakkuningga atuartut ilikkartinniarnissaat aamma tuluttoortitsinerup avataatigut oqaatsinik taakkuningga atuinermikkut. Aammattaaq tassani pineqarpoq tuluttut atuartitsinermut atortussanik atuineq tuluttut oqaatsit atuartitsissutitut atorneqarnerattut isigisariaqartoq .

§ 3, imm. 3-imut

Aalajangersakkami Naalackersuisut periarfissinneqarput maleruagassanik sanioqqutitsilluni immikkut ittumik pisoqartillugu kalaallit danskillu oqaasiinit allaanerusunik atuilluni atuartitsisoqartarnissaata akuerisarnissaanut. Immikkut akuerineqarsinnaasussat tasaanerussapput atuarfiit meeqqanut Kalaallit Nunaanni najugaqartunik angajoqqaalinnut sivikitsuinnaanerusumilli nunami maaniittussanut atuartitsisartussat. Tamatigut kalaallisoortitsineqartassaaq kalaallisut oqaatsit atorlugit, danskisoortitsineqartassallunilu danskisut oqaatsit atorlugit. Atuarfik meeqqanik Kalaallit Nunaanni najugaqanngitsunik imaluunniit najugaqarsimangitsunik angajoqqaalinnik atuartitsippat pissusissamisuuqinnassaaq oqaatsit atuartitsissutit kalaallisuuqullutillu danskisuuqjuppata, tamanna angajoqqaat Kalaallit Nunaanni inatsisit malillugit meeqqamik atuartinneqarnissaannik kissaateqarnerannik peqquteqarsimassammat.

§ 4, imm. 1-imut

Immikkut atuartitaaneq aamma perorsaaniarnikkut allatigut ikiuuttarnissaaq, tapertaasumik atuartitaanissaaq pillugit maleruagassaliornissamut Naalackersuisut piginnaatinneqarput, aammalu atuartut napparsimanertik, peqqiilliuuteqarnertik imaluunniit ajunngitsumik atugaqarnissaat eqqarsaatigalugit atuarfimmi atuartinneqarsinnaanngitsut pillugit maleruagassiuunneqarnissaannut piginnaatitaallutik.

alajangersagaq imarisamigut atuarfik pillugu Inatsisartut peqqussutaanni nr. 8-mi, 21. maj 2002-meersumi §§ 14-15-imut naapertuuppoq.

Imm. 1, nr. 1-imi pineqarput nalinginnaasumik kiisalu annertusisamik immikkut atuartitsisarnerit. Atuarfik pillugu Inatsisartut peqqussutaanni nr. 8-mi, 21. maj 2002-meersoq assigalugu inatsisitigut aalajangersakkani nalinginnaasumik annertusisamillu immikkut atuartitsisarnerit immikkoortinneqanngillat.

Imm. 1, nr. 2-mi pineqarput atuartut ikorfartuiffigineqarallarnissamik pisariaqartitsisut atuartitaanissaat, immikkut atuartitsineq pinngikkaluarlugu. Uani tunngavissaatinneqartoq tassaavoq atuartut taamaallaat immikkut atuartinneqarnissamut innersuunneqartassasut ajornartorsiutit piujuarnerusut ikorsiivigineqarnissaat pineqaraangat. Meeqqat ataasiinnarnik oqaasillit ikorfartorlugit atuartinneqartarnissaat aamma uani pineqarpoq. Tunngaviusumik atuarkiit namminersortitat meeqqat ataasiinnarnik oqaaseqartut Kalaallit Nunaanni najugaqavissut kalaallisut danskisullu meeqqat atuarkianni piumasaqaatit assingi tunngavialugit ilinniartinneqartarnissaat qulakkeertassagaat piumasarineqarpoq.

Nalinginnaasumik ikorfartuilluni atuartitsinissamut pisussaaffik immikkut atuartitsisarnissaq pillugu nr. 1 naapertorlugu pisussaaffimmit pingaarnuvoq.

Imm. 1, nr. 3-imi pineqarput atuartut napparsimanertik, peqqiilliornertik imaluunniit ajunngitsumik atugaqarnissaat eqqarsaatigalugit sivisuumik atuarkiimmi atuartinneqarsinnaanngitsut.

Tunngaviusumik atuarkiit namminersortitaq nammineq immikkut atuartitsinissamik imaluunniit oqaatsit ilitsoqqussaralugit pigineqartut pillugit atuartitsinissamik neqerooruteqarsinnaanngikkuni, atuarkiit kommunalbestyrelsi imaluunniit tunngaviusumik atuarkiit namminersortitaq alla isumaqatigiissuteqarfigisinnaavaa atuartup immikkut atuartitaanera imaluunniit oqaatsit ilitsoqqussaralugit pigineqartut pillugit atuartitaanera meeqqat atuarkianni imaluunniit tunngaviusumik atuarkiimmi namminersortitami allami ingerlanneqassasoq.

§ 4, imm. 2-mut

Imm. 2-mi aalajangersakkami perorsaaneq aamma tarnip pissusaa pillugit siunnersuineq akeqanngitsumik Naalakkersuisut tunniuttassagaat, atuarfik pillugu Inatsisartut peqqussutaanni nr. 8-mi, 21. maj 2002-meersumi § 33, imm. 1, nr. 1-imut naapertuuppoq. Atuartunik siunnersuinerup meeqqat atuarkianni atuartut siunnersorneqartarnerat assigissavaa.

§ 5-imut

Aalajangersakkakut aalajangersarneqarpoq ukioq atuarfiusoq augustip aallaqqaataani aallartittartoq. Tamanna imatut paasineqassanngilaq tunngaviusumik atuarfiup namminersortup atuartsinini augustip aallaqqaataani aallartittassagaa. Erseqqissaataavoq ukiup atuarfiusup augustip aallaqqaataaniit juulip 31-anut ingerlasussaananik. Ukiumi atuarfiusumi ullut atuarfigineqartussat minnerpaamik 200-uussapput, meeqqat atuarfianni ikinnerpaaffissatut piumasarineqartunut naapertuullutik. Tunngaviusumik atuarfiup namminersortitap killiliussap taassuma iluani nammineeeluni aalajangersinnaavaa ullut atuartsivissat qassit kissaatiginerlugit, aammalu kissaatiginerlugu sapaatit akunneranut ullut tallimat imaluunniit ullut arfinillit atuarfigineqartassanersut.

Kapitali 2-mut

Tunngaviusumik atuarfiit namminersortitat, aqutsisut atuartsisullu

§ 6, imm. 1-imut

Imm. 1-mi aalajangersakkami erserpoq tapiissuteqarfigineqartarnissamut piumasaqaataasoq atuarfiit suliffeqarfiussasut imminnut pigisut, taakkulu aqunneqarnissaat aningaasatigullu atugarisassaasut pillugit malittarisassani aalajangersakkat Naalakkersuisunit akuerineqartassasut.

§ 6 tunngaviusumik atuarfinnut namminersortitanut ingerlatsinermut tapiissutinik pineq ajortunut atuutinngilaq.

Naalakkersuisut piginnaatinneqarput malittarisassat imarisaat pillugit maleruagassiornissamut. Malittarisassat imassaannik maleruagassat tassaasussaapput minnerpaamik piumasaqaataasussat. Malittarisassat ilaatigut imarissavaat siulersuisunut ilaasortat ilaasa angajoqqaat akornannit angajoqqaanillu qinerneqartarnissaat pillugit maleruagassat. Aammattaaq angajoqqaat atuarfiup aningaasatigut missingersuutaannik naatsorsuutaannillu atuarfimmit paasitinneqartarnissaat malittarisassani ilaatinneqassaaq. Aalajangersagaq tunngavigalugu Naalakkersuisut aamma tamanit najoqqutarineqartussanik malittarisassalorsinnaapput aammattaaq nakkutilliisussanik toqqaasarnissami periaasissat pillugit aalajangersakkanik imaqsarinnaasunik, tak. siunnersuummi § 10, imm. 2.

§ 6, imm. 2-mut

Suliffeqarfiit imminnut pigisut nalinginnaasumik maleruagassaasut naapertorlugit suliffeqarfik arlaannaannulluunniit atasuusanngilaq, aammalu aningaasat suliffeqarfiup immiut pigisup siunertaanut atorineqassapput, matumunnga tunngatillugu atuarfimmut atuartsinermullu tunngasunut. Aalajangersakkami

pineqarpoq inatsit manna malillugu tapiissutit atuarfimmi atuartisinernullu tunngasut atorpeqassasut. Piumasaqaat tamanna naammassineqarpat atuarfiit tapiissutinik qanorluunniit atuisinnaapput. Tunngaviusumik atuarfiit namminersortitat taamaallaat atuarfimmu pineqartumut soqutiginninnermit aqunneqassapput atuarfiup nammineq atuartuinut iluaqutissaasumik, aammalu ataatsimoorussamik allatulluunniit iliornikkut susassaqaanngitsunit imaluunniit avataaninngaanniit soqutigisanit aqunneqassanatik. Siunertaanngilaq pissusissamisoortumik, pingaartumik perorsaanermik aallaaveqarluni tunngaviusumik atuarfiit namminersortitat imaluunniit meeqqat atuarfiata akornanni suleqatigiinnissap akornuserneqarnissaa.

Aalajangersakkami siulersuisut aammalu pisortap atuarfiup aningaasaataanik atuinissaannut killiliinerit aalajangersarneqarput. Pisortaq siulersuisunut akisussaasuusaaq aningaasat atuarfimmu atuartisinernullu atorpeqarnissaannut, siulersuisullu angajoqqaatigiinnut akisussaasuussapput.

§ 6, imm. 3-mut

Imm. 3-imi takuneqarsinnaavoq tunngaviusumik atuarfiup namminersortitap siulersuisui tassaasut atuarfiup pingaarnertut aqunneqarneranik isumaginnittut aammalu atuarfiup ingerlanneqarnera pillugu kommunimut tunngaviusumik atuarfiup namminersortup najugaqarfittaanut ingerlanneqarneranut akisussaasut. Ilaatigut tamatuma nassataraa tapiissuteqarnermi piumasaqaatit atugassaritallu eqqortumik maleruarneqarnissaannut siulersuisut akisussaasuunerat, maleruarneqanngippatalu kingunissaannut aamma akisussaasuuneq.

§ 6, imm. 4-mut

Suliffeqarfittut imminut pigisutut tunngaviusumik atuarfiit namminersortitat pisortat sullissinerat pillugu inatsimmi aalajangersakkat avataaniipput. Naapertuuttutut isigineqarpoq suliffeqarfinnut taakkununga nipangersimasusaataaneq pillugu aamma suliami attuummassuteqarneq pissutigalugu peqataasinnaannginneq pillugu aalajangersakkat atortuutinneqassasut.

§ 6, imm. 5-imut

Imminut pigisuunermut tunngaviusumik naleqqunnerpaatut isigineqarpoq tunngaviusumik atuarfiit namminersortitat nerisaqarfiutigisunik immikkoortortallit kisermaassillutik illuutinik piginnittuussappata. Atuartut najugaqarfiannik immikkoortortaqaarneq pissutigalugu immikkut ittunik attartuisoqariataarsinnaavoq kisermaassinertut isikkulinnik attartortitsisumullu iluaqusiillutik atuarfimmu ajoqusiisunik. Atuarfik illuutinik toqqaannartumik piginnittuussaaq. Aktiaateqarluni

ingerlatseqatigiiffimmit taannaluunniit aqutigalugu pigineqarsinnaanngillat, tassami tunngaviusumik atuarfiit namminersortitat tamarmik immikkut suliffeqarfiussammata imminnut pigisut. Atuarfik kisimiilluni piginnittuussaaq, tassalu imaappoq illuutit ataatsimut assingusumilluunniit pigineqarsinnaanngillat. Atuarfiup illuutaasa nunaminertaasaluunniit ilaminiinnannguisa attartugaanerit, assersuutigalugu timersornermut siunertanut tunngasunut, akuerineqarsinnaavoq, tamannalu oqaatsip "taakku annersaannik" atorneqarneranut pissutaavoq. Tassa imaappoq, tunngaviusumik atuarfik namminersortitaq nerisaqarfiutigisunik immikkoortortalik tunngaviatigut illuutinik tamanik piginnittuusussaavoq, qaqutigunnarli atuarfiup illutaanik attartorsinnaalluni.

§ 6, imm. 6-imut

Imm. 6-imi aalajangersarneqarpoq tunngaviusumik atuarfik namminersortitaq sumiissutsimigut illuutigullu immikkoortuussasoq. Pisariaqartinneqarpoq immikkoortortanik pilersitsinissamik akuersissuteqarnissap itigartitsissutigineqarnissaanut erseqqissumik tunngavissaqarnissaq, nalunaaruteqarfissatut piffissamik killiliussamik eqqortitsinani pilersinneqartunut. Aalajangersakkap imaraa immikkoortortanik pilersitsisoqartassanngitsoq atuarfiup assinganik ingerlaqatigisassaanik, tassa qallunaatut 'parallelskolemik'. Akerlianilli atuarfiup pissusissamisoortumik allisikkiartorneqarnissaata nuukkiartuaarneqarnissaatalu akornusiivigineqarnissaat siunertarineqanngilaq, taamatullu aamma pitsaanerusinnaalluni assersuutigalugu atuartut minnerit innarluutillilluunniit atuarfimmu immikkoortortaliussami assigisaaniluunniit atuartinneqartassappata.

§ 7, imm. 1-imut

Aalajangersakkami tunngaviusumik atuarfimmi namminersortitami pisortamik ataatsimik atorfinitsitsisoqassasoq aalajangersaavigineqarpoq. Nalinginnaasumik suliffeqarfiup imminut pigisup siulersuisui suliffeqarfiup pisortassaanik atorfinitsitsisuusassapput, angajoqqaanit piginnaatitaanertik aallaavigalugu. Pisortaq ulluinnarni atuartitsinermik aqutsisuusaaq, aammalu tunngaviusumik atuarfiup namminersortitap siulersuisuinut atuarfiup ingerlanneqarnera pillugu akisussaasuulluni.

§ 7, imm. 2-mut

Aalajangersakkami erseqqissarneqarpoq pisortap atuartut atuartitaasussaatitaanermik eqqortitsinissaat qulakkiissagaa. Atuartitaasussaatitaaneq aallartissaaq atuarnerup aallartinnerani qaammatisiutit malillugit ukiumi meeqqap arfinilinnik ukioqalerfiani, taamaatissallunilu atuartup ukiumi qulingiluani ataavartumik

atuartinneqareerneratigut, tak. atuarfik pillugu inatsisartut peqqussutaanni nr. 8-mi, 21. maj 2002-meersumi § 26, imm. 1. Taamatut atuarfiup pisortaata nakkutilliisut pinnatik atuarfiup pisortaata pisussaaffilerneqarneranut pissutaavoq nakkutilliisut ajornartorsiutigisussaammassuk atuartunik ulluinnarni malinnaaniarneq. Nakkutilliisut § 10, imm. 2 naapertorlugu atuartunik ataasiakkaanik nakkutilliineq suliaassarinnigilaat, kisiannili nakkutigisassaralugu atuartitsinerup meeqqat atuarfianni atuartitsinermi angusassanut nallersuuttumik ingerlanneqarnissaa. Kommunalbestyrelsip nalinginnaasumik pisussaaffigaa atuartut atuartussaataantertik eqqortinneraat nakkutigissallugu. Taamaattumik aalajangersakkami erseqqissarneqarpoq atuartup atuartussaataanini eqqortinngippagu, tamanna pisortap kommunalbestyrelsimut nalunaarutigissagaa.

Aammattaaq aalajangersakkami nassuiarneqarpoq "kommunalbestyrelsi" tassaasoq kommunimi atuarfiup sumiiffigisaani kommunalbestyrelsi.

§ 7, imm. 3-mut

Kommunalbestyrelsip atuartut atuartussaataanerannik nakkutilliineranut tunngatillugu atuartup atuarfimmi atuarunnaarnerata kingornagut sapinngisamik piaarnerpaamik atuarfiup kommunalbestyrelsi ilisimatittassavaa. Nalunaaruteqarnissamut piumasaqaat taamaallaat atuartunut atuartussaataasunut tunngavoq.

§ 8-mut

Siunniunneqarpoq tunngaviumik atuarfiup namminersortitap pisortaq atuartitsisullu aningaasarsiatigut atorfinitsitaanermilu atugarisassaas pillugit nammineerluni isumaqatigiissuteqarfigisassagai. Pisortanilli tapiiffigineqartarnissaq eqqarsaatigalugu piumasaqaataavoq aningaasarsiatigut atorfinitsitaanermilu atugassarititaasut pisortani atorfinnut assingusunut naapertuutissasut. Tunngaviumik atuarfinni namminersortitani pisortanut atuartitsisunullu aningaasarsiatigut atorfinitsitaanermilu atugassarititat Naalakkersuisunut kommunalbestyrelsimullu ilisimatitsissutigineqartassapput. Aningaasarsiatigut atorfinitsitaanermilu atugassarititaasut pisortani atorfinnut assingusunut naapertuutinnippata atuarfik tapiissutinik pissarsisinnaanngilaq, tunngaviumik atuarfiit namminersortitat Inatsisartut inatsisaanni piumasaqaataasunik eqqortitsisussaammata, tak. § 13.

Aalajangersakkami tunngaviumik atuarfiit namminersortitat aningaasarsiatigut atorfinitsitaanermilu atugassarititaasuni periarfissinneqarnissaat eqqarsaatigineqarpoq atuartitsisarnissap - taamatullu aamma atuartitsisut sulisarnissaasa - meeqqat atuarfianni ilisimaneqartumit allaanerusumik aaqqissuunneqartarsinnaanera.

"Atorfik assingusoq" naliivigineqaraangat pisortanut atuartitsisunullu atorfiit imarisaat aalajangersimalluinnartut tunngavigineqassapput. Pingaartumik tunngaviumik atuarfiup namminersortitap pisortaa meeqqat atuarfianni pisortamut assersuukkuminaassaaq, pissutigalugu tunngaviumik atuarfiup namminersortitap pisortaa aningaasaqarnikkut perorsaanikkullu amerlaqisutigut siulersuisuminut angajoqqaatigiinnullu akisussaasuussamat.

Aalajangersagaq tunngaviumik atuarfinnut namminersortitanut ingerlatsinermut tapiissutinik pineq ajortunut atuutinngilaq, tak. § 23.

§ 9, imm. 1-imut

Imm. 1-imi allassimavoq tunngaviumik atuarfimmik namminersortumik pilersitsineq kommunalbestyrelsimut Naalakkersuisunullu nalunaarutigineqartassaq. Tunngaviumik atuarfimmik namminersortitamik nalunaarutiginninnerup kommunalbestyrelsi periarfississavaa kommunimi meeqqat atuarfiinik ingerlatsineq pillugu pitsaanerumik pilersarusiortarnissaanik. Naalakkersuisunut nalunaarutiginninnissamat tunuliaqutaavoq nuna tamakkerlugu tunngaviumik atuarfiit namminersortitat pillugit tamakkiisumik ilisimasaqarnissaat. Aalajangersakkami aamma pineqarput tunngaviumik atuarfiit namminersortitat tapiissuteqarfigineqarneq ajortut.

§ 9, imm. 2-mut

Aalajangersaavigineqarpoq atuarfinnik pilersitsinerit pisassasut ukiup atuarfiusup aallartinnerani. Aalajangersagaq ikkunneqarpoq tapiissuteqartarnissamat aalajangersakkat, kiisalu atuartut tunngaviumik atuarfimmit namminersortumit imaluunniit meeqqat atuarfiannit atuarfimmut nutaamik pilersinneqartumut nuuttartussat eqqarsaatigalugit.

§ 9, imm. 3-mut

Imm. 3-p imaraa ilaatigut nalunaaruteqartarnissamat piffissaliussassanik atuarfiillu qinnuteqartut periaasissai allat pillugit Naalakkersuisut maleruagassiortarnissamat piginnaatitaanissaat. Aalajangersagaq tunngaviumik atuarfinnut namminersortitanut tapiissutinik pineq ajortunut atuutinngilaq.

Nalunaarutit pimoorusaanissaat qulakkeerumallugu periarfissiisoqarpoq nalunaaruteqarnermi akiliutaagallartunik piumasaqaateqartoqarsinnaaneranut.

*Kapitali 3-mut
Nakkutilliineq*

§ 10, imm. 1-imumut

Soorlu imm. 1-imi takuneqarsinnaasoq angajoqqaatigiit tassaapput atuarfiup nalinginnaasumik ingerlanneqarneranut akisussaasuullutillu nakkutiginnittuusussat, aamma meeqqat atuarfianni atuartitsinermut nalinginnaasumut nallersuunneqarsinnaasumik atuartitsisoqartoq. Angajoqqaatigiit nammineerlutik aalajangertassavaat nakkutiginninnerup qanoq isumagineqarnissaa.

Angajoqqaatigiit nakkutilliineranni ilaapput atuarfiup ingerlanneqarnerata tamarmi nakkutigineqarnera, matumani angajoqqaatigiit sinnerlugit siulersuisut aquataasa aningaasat nakkutigineqarnerat ilanngullugu, atuartitaanerup nakkutigineqarnera aammalu meeqqat atuarfianni nalinginnaasumik piumasqaataasartunut nallersuunneqarsinnaasumik atuartitsinerup ingerlanneqarnissaata nakkutigineqarnera. Nakkutilliinissaq taaneqartoq kingulleq angajoqqaatigiit nakkutiginninnissaasa saniatigut nakkutilliisumit avataanersumit isumagineqassaaq, tak. § 10, imm. 2, imaluunniit kommunalbestyrelsimit § 10, imm. 2-3 naapertorlugu isumagineqassalluni.

§ 10, imm. 2-mut

Imm. 2 naapertorlugu angajoqqaatigiit avataanniit inuk ataaseq arlaqartulluunniit toqqarneqarsinnaapput meeqqat atuarfianni atuartitsinermut nallersuuttumik atuartut atuartinneqarnerinik nakkutiginnittussat. Nakkutilliisussaq nakkutilliisussalluunniit taakku angajoqqaatigiinnit sivisunerpaamik ukiunut sisamanut toqqarneqartassapput. Siunnersuutigineqarpoq nakkutilliisussamik qinersinermi angajoqqaatigiit tamakkerlutik peqataasarnissaat, peqataasussalli qanoq amerlassuseqarnissaat pillugu maleruagassanik aalajangersagaqanngilaq. Angajoqqaatigiit kommunalbestyrelsi qinnuvigisinnaavaat nakkutilliineq isumageqqullugu. Imm. 2-mi pkt. 2-mi, oqaaseqatigiit aappaanni aalajangersarneqarpoq inuk avataaneersoq nakkutiginnittuusussaq suliami attuummassuteqarnini pissutigalugu peqataasinnaanngitsuussanngitsoq, imaluunniit atuarfiup ingerlanneqarneranut annertuumik nammineq soqutigisaqartuussanngitsoq, imaluunniit atuarfimmi atorfeqartuussanngitsoq. Atuarfiup kommunalbestyrelsi ilisimatissavaa kina nakkutilliisussatut toqqarneqarsimanersoq.

Tunngaviusumik atuarfimmik namminersortitamik pilersitsinissamut tunngavimmut naleqqunnerpaatut isigineqarpoq nakkutilliisussamik qinersinissamut angajoqqaat nammineerlutik periarfissinneqarnissaat. Meeqqat atuarfianni nalinginnaasumik piumasqaataasartunut nallersuuttumik atuartut atuartinneqartarnissaat qulakkeeriviginarlugu siunnersuutigineqarpoq arlaannaannulluunniit atanngitsumik

nakkutilliisussamik qinersisoqartarnissaa. Nakkutilliisussap sunik piginnaasaqarnissaa piumasaqaasiorfigineqanngilaq. Piumasaqaatigineqassaarli nakkutilliisuutitassaq atuarfiup pissusiinut ima paasisimasaqartigissasoq meeqqat atuarfianni atuartut nalinginnaasumik angusaqarsimanissaannik nallersuuttumik nalilersuisinnaassalluni. Aammattaaq piumasaqaatigineqassaaq nakkutilliisuutitassaq oqaatsinik kalaallisut, danskisut tuluttullu atuartitsissutaasunik ima paasinnissinnaatigissasoq ilinniagassat taakkua atuartitsissutigineqarneranni nalilliilluarsinnaanissamut periarfissaqassalluni.

Nakkutilliinissap pilersaarusiornissaa ingerlanneqarnissaalu nakkutilliisup akisussaafigissavaa, nakkutilliinissamilli pilersaarusiaq pilersinneqallaqunarpog tunngaviusumik atuarfik namminersortitaq paaseqatigalugu, soorlu assersuutigalugu periusissaq, annertussusissaa qanorlu tamaviaarunneqartiginissaa pillugit. Nakkutilliisarnissamik suliaasat tamarmik pilersaarummi takuneqarsinnaasariaqarput, aammattaaq nakkutilliisup qanoq angajoqqaatigiinnut atuarfiullu siulersuisuinut nalunaarutiginnittarnissaa ilanngullugu, tak. § 10, imm. 4.

Avataanit nakkutilliisut atuartut tamaasa ataasiakkaarlugit immikkut naliliivigissanngilaat, taamaallaalli atuartitsineq naammassineqarsimasog nalinginnaasumik naliliivigissallugu.

Tunngaviusumik atuarfik namminersortoq meeqqat atuarfiannit allaanerusumik naliliisinnaavoq atuartitsissutissat aalajangersimasut qaqugu atuarnerup ingerlanerani atuartitsissutigineqarnissaat pillugu. Meeqqat atuarfianni atuartitsinermut nallersuuttumik atuartitsinerup naliliiviginissaanut tiimit agguataarneqartarnissaat pillugit tunngavissatut pilersaarusiata aammalu atuagassanut tunngavissatut pilersaarusiata meeqqat atuarfeqarfiannit nassiussuunneqartartut nakkutilliisup najoqqutatut atorsinnaavai.

Nakkutilliisut akissarsiaqartinneqarnerat inatsimmi aalajangersarneqanngilaq, taamaattumillu nakkutilliisut atuarfiullu namminneq isumaqatigiissutigissallugu.

Taarsiullugu angajoqqaat kommunalbestyrelsi nakkutiginnittoqqullugu noqqaavigisinnaavaat, aammalu angajoqqaat qanoq iliuuseqanngippata kommunalbestyrelsi nakkutilliinermik ingerlatsissaaq. Kommunalbestyrelsip nakkutilliinermi aningaasartuutit nammineq akilissavai.

§ 10, imm. 3-mut

Angajoqqaatigiit nakkutilliisussamik qinersinngippata nakkutilliineq kommunalbestyrelsimi ingerlanneqassaaq. Tamatumunnga pissutigittinneqarpoq kommunalbestyrelsip nalinginnaasumik nakkutigisassarimmagu kommunimi innuttaasut tamakkerlutik atuartussaataaannermik eqqortitsinissaasa qularnaarsimaneqarnissaat. Kommunalbestyrelsip nakkutilliinermut aningaasartuutit akilissavai.

§ 10, imm. 4-mut

Atuartut angusimasaat pillugit nakkutilliisuutitaq ukiut tamaasa angajoqqaatigiinnut siulersuisunullu nalunaarusiortassaaq. Imaanngilaq atuartut ataasiakkaat angusimasaat nakkutilliisup nalunaarusiortassagai, atuartulli ataatsimut angusimasaat nalunaarusiortassallugit.

Tunngavissaatinneqarpoq nakkutiginnittuutitap amigaatit iluarsineqarnissaannut pisariaqartumik piffissaliisarnissaa. Atuartitsineq suli amigaateqarpat angajoqqaatigiit siulersuisullu tusarniaavigereerlugit tamanna kommunalbestyrelsimut nalunaarutigineqassaaq. Tamatuma kingornagut kommunalbestyrelsip aalajangersinnaavaa atuartut atuarfimmi allami atualersineqassanersut, kommunalbestyrelsip suliassarimmagu kommunimi meeqqat atuartussaaitaasut tamakkerlutik meeqqat atuarfianni atuartitaanissaat imaluunniit ima pitsaatigisumik atuartitaanissaat meeqqat atuarfianni nalinginnaasumik piumasaqaataasartunut nallersuuttumik atuartinneqassallutik.

§ 10, imm. 5-imut

Imm. 5-imut aalajangersagaq ilanngunneqartoq naapertorlugu immikkut pisoqartillugu kommunalbestyrelsi aalajangiisinnaavoq atuarfiup nakkutigineqarnerata annertusineqarnissaanik. Uani ilaatigut eqqarsaatigineqartoq tassaavoq taamaaliortoqartarsinnaanera, soorlu apeqqusiivigineqarpat meeqqat atuarfianni nalinginnaasumik piumasaqaataasunut nallersuuttumik atuarfik atuartitsinersoq. Aalajangersagarli atuartitsinermuinnaq tunnganngilaq. Aalajangersagaq tunngavigalugu kommunalbestyrelsi susassa qarfinnik allanik, atuarfiup aningaasaataasa atorneqarnerinik assigisaannilluunniit sukannernerusumik nakkutilliisinnaavoq.

§ 10, imm. 6-imut

Nakkutiginnittuusooq kommunalbestyrelsilu imm. 2, 3 aamma 5-imi taaneqartut nakkutiginninnerminut atortussanik tamanik takunnissinnaatitaapput, tassa atuartitsinerup pilersaarusiorneqarneranut tunngassuteqartunik, matumani ilaallutik atuartunut suliassiisutit, karakterit allattorsimaffii, perorsaaneq tarnillu pissusaat pillugit siunnersuisarfiup oqaaseqaatai aammalu atuartut atuartitsinerlu il.il. pillugit pisortat oqartussaasut akornanni allakkatigut attaveqatigiinnermi allakkat.

§ 11-imut

Tunngaviusumik atuarfiit namminersortitat kommunalbestyrelsi qinnuigisinnaavaat atuartut najugaqarfiannik atuarfimmum atasumik nakkutiginnittoqullugu. Kommunalbestyrelsiip nakkutiginninnissaani pineqartut taamaallaat tassaassapput atuarfiup suliniutai § 10-mi pineqan-ngitsut.

Kommunalbestyrelsiip nakkutilliinerminut aningaasartuutit akilissavai.

Tunngaviusumik atuarfiup namminersortitap atuartut najugaqarfiannik kommuni nakkutillieqqullugu qinnuiginnissinnaaneranut peqqutaasoq tassaavoq, nakkutilliineq tamanna atuarfiup ingerlanneqarneranik nakkutilliinermut ilaangimmat.

§ 12, imm. 1-2-imut

Kommunalbestyrelsi oqartussaaffilerneqarpoq tunngaviusumik atuarfiup namminersortitap ingerlatsinerata allanngortinneqarnissaa pillugu atuarfimmum peqqusisinnaanissamut, tunngaviusumik atuarfiit namminersortitat ingerlatsinissaannut malittarisassanut atuuttunut akerliusumik ingerlatsisoqarpat.

Kommunalbestyrelsiip peqqusisinnaatitaaneranut tunuliaqutaavoq kommunalbestyrelsi tassaammat kommunimit ingerlatsineranut tapiissutinik tunniussisartussa. Akuersisartutut, nakkutiginnittut kinguneqartitsisartutullu pisortatut oqartussaaneq imminnut ataqatigiittariaqarput.

Imm. 2-p atuarfiup ingerlanneqarnera pillugu kommunalbestyrelsi paasissutissanik inatsisitigut piumasaqarsinnaatippaa.

Inatsisartut inatsisaat manna naapertorlugu tapiissuteqartarnermi piumasaqaatit tunngaviusumik atuarfimmum namminersortumit eqqortinneqarnerisut pillugit misissuinissamut paasissutissanik attuumassuteqarsinnaasunik tamanik kommunalbestyrelsi piniarsinnaavoq.

Aalajangersagaq aamma atuuppoq tunngaviusumik atuarfimmum namminersortitanut ingerlatsineranut tapiiffigineqarneq ajortunut. Atuarfiit taakku pillugit paasissutissanik attuumassuteqartunik tamanik kommunalbestyrelsi piniarsinnaatitaavoq, Inatsisartut inatsisaanni matumani piumasaqaataasunik eqqortitsisimanerisut misissuinissaminut atugassanik, taamaallaat pineqanngillat paasissutissat aalajangersakkanut atuarfimmum taakkununga attuumassuteqanngitsut, tak. § 23.

Kapitali 4-mut

Tapiiffigineqarnissamut piumasaqaatit tapiissutillu atorneqarnerat

§ 13, imm. 1-imut

Aalajangersarneqarpoq tunngaviusumik atuarfiit namminersortitat Inatsisartut inatsisaanni matumani piunasaqaatinik eqqortitsisut kommunimit atuarfiup ingerlanneqarfigisaanit ingerlatsinermut tapiissuteqarfigineqarnissamik inatsisitigut pisinnaatitaaffeqartut. Atuarfiup kommunerisaata meeqqanik atuarfimiittunik akiliussisarnissaanut tunuliaqutaavoq piunasaqaataammat meeqqat kommunimi atuarfiup sumiiffigisaani inuit nalunaarsorneqarfiannut nalunaarsimasuunissaat. Tamatuma malitsigissavaa meeqqat taakku pillugit ataatsimoortumik tapiissutinik kommunip pisarnissaa.

§ 13, imm. 2-mut

Atuarfiit tapiissutinik ukiumut aningaasaliiffiusussap tullianut ileqqaagaqarsinnaapput aammalu atuarfimmik atuartitsinermillu ingerlatsinermut taarsigassarsinnaallutik.

Atuarfimmik atuartitsinermillu ingerlatsinermi atuartitsinermut tunngassuteqartut tamarmik pineqarput, tamatumani atuarfiit illutaat, atuartut najugaqarfii, atuarfimmi sulisunut inissiat ilaallu ilanngullugit.

Taamaalillutik atuarfiit periarfissinneqarput atuarfinni pissutsit aalajangersimasut naapertorlugit tapiissutit atorneqarnissaannut naleqqussaasarnissamat.

§ 14 imm. 1-imut

Tunngaviusumik atuarfiup namminersortitap minnerpaamik 1.-7. klassimut atuartitsineq neqeroorutigissavaa. Tamatumunnga tunuliaqutaavoq meeqqanut atuarfeqarfimmut naleqqiussinissamik kissaateqarneq, taamaalilluni tunngaviusumik atuarfinni namminersortuni atuartitsineq ingerlanneqartoq meeqqat atuarfianni minnerpaamik atuartuni nukarlerpaani akullernilu atuartitsinermut naapertuunniassammat.

§ 14, imm. 2-mut

Siunnersuummi imm. 2-p imaraa Naalakkersuisut tunngaviusumik atuarfiup namminersortitap minnerpaamik 1. klassiniit 7. klassimut atuartitsinermik neqerooruteqarnissaata avataatigut immikkut akuersissuteqarsinnaatitaasut. Taamaalilluni tunngaviusumik atuarfiit namminersortitat 1.-3. klassinik ingerlatsisut akuersissuteqarfigineqarnissaat periarfissaqalissaaq, meeqqat atuarfianni nukarlerpaanut naapertuuttut. Aammattaaq tunngaviusumik atuarfiit namminersortitat marluk arlallilluunniit atuartunik angajullerpaanik

ataatsimoortitsinissaminnut kattussisinnaaner atakuersissuteqarsinnaaneq. Aammattaaq atuarfinnik nutaanik pilersitsisoqarneranut atatillugu immikkut akuersissuteqarnissaq atorineqarsinnaassaaq, taamaalilluni klassit ukiuni arlalinni ingerlaavartumik amerliartuaartinneqarsinnaaner at pisinnaassalluni.

§ 15-imut

Suliffeqarfittut imminut pigisutut atuarfiup aningaasaatai sapinngisamik isumannaannerpaamik aqunneqassapput. Atuarfiit aningaasaatiminnik iluanaarniuteqarlutik taamalu atuarfiup aningaasaataanik atoriaannarnik ulorianartorsiortitsisinnaasumik siunertaqartunut inissiissanngillat.

Aalajangersakkami pineqarput aningaasat tapiissutisiat kiisalu aningaasat allatut iliorluni atuarfimmit pissarsiarineqartut, soorlu nammineerluni akiliutit. Aktianut aningaasaliissuteqarnerit inerteqqutaapput. Taamaattorli akuersaarneqarsinnaavoq ingerlatsinermut aningaasaatit pitsaanerusemik erniaqarnissaat anguniarlugu atuarfiup summiiffimmi aningaasaateqarfiup aktiaanik pisariaqartunik pisisinnaasarnissaa, aningaaseriveqarnerup iluani tamanna pillugu nalinginnaasumik neqeroorutaasartut naapertorlugit. Atuarfiit inuussutissarsiunik ingerlatsinermi akooqusaanngillat. Aningaasaliinissat akuerineqarsinnaanngitsut ilaattut assersuutigineqarsinnaapput qularnaveeqqusiissutit allagartaannik, pantebrevinik, pisinerit. Aningaasanik inissiinernut akuerineqarsinnaasunut ilaapput uninngasuutit Kalaallit Nunaanni Danmarkimiluunniit aningaaserivinni aktiaatit, danskit realkreditinstitutit aamma suliffeqarfinit aningaasalersuisarfinit allanit, pisortanit nakkutigineqartunit atulersitaasut, aammalu aningaasanik nalillit allagartaat, fondsaktiat imaluunniit akiligassanut allagartat Namminersornerullutik Oqartussanit imaluunniit danskit naalagaaffianit atulersitaasut qularnaveeqqusiivigisallu.

Kapitali 5-mut

Tapiissuteqariaatsit tapiissutinillu naatsorsuineq

§ 16 imm. 1-imut

Tunngaviusumik atuarfiit namminersortitat Inatsisartut inatsisaanni matumani aalajangersakkanik naammassinnissimasut kommunimit atuarfiup ingerlanneqarfianit ingerlatsinermut tapiissutisinnissaminni inatsisitigut piimasaqaateqarsinnaapput.

Atuartumut ataatsimut tapiissutip ukiumut angissusissaa ima aalajangerneqartassaaq, illoqarfiup aturfiani atuartumut ataatsimut ukiumut ataatsimoortumik tapiissutitut kommunip tigusartagaasa annertoqatigissagaa. Tamatumunnga peqqutaavoq

tunngaviusumik atuarfiit namminersortitat illoqarfinni pilersinneqartarnissaannik naatsorsuutiginninneq, taamaattumillu illoqarfinni atuarfimmi atuartumut ataatsimoortumik tapiissutitut tunngavissarititaasut atorniarneqarput, aammattaaq tunngaviusumik aturfinnut namminersortitanut atuuttut. Taamaalilluni kommunit tunngaviusumik atuarfinnut namminersortitunut atuartussanik tunniussisut aningaasartuuteqannginnissaat anguniarneqarpoq. Tamatuma saniatigut annertussuserititap taassuma aalajangersarneratigut aaqqissuussineq pisariitsoq anguniarneqarpoq.

§ 16, imm. 2-mut

Aalajangersakkakut aalajangersarneqarpoq perorsaaneremut aamma tarnit pissusaannut tunngatillugu siunnersuineremut atatillugu atuartunik annertusisamik immikkut atuartinneqarnissamik allatullu perorsaaneremut aamma tarnit pissusaannut tunngatillugu ikiorserneqartariaqartunut aningaasartuutit utertillugit akilerneqarsinnaasut.

Utertitsilluni akiliuteqarneq meeqqat atuarfianni atuartut pillugit kommuninut utertitsilluni akiliisarnertulli pisassammat imaappoq utertitassanut naatsorsuutit ukiumut marloriarluni KIIIP-mut nassiunneqartassasut utertitsilluni akiliisoqannginnerani.

§ 17, imm. 1-imut

Atuartut qassiunerannik naatsorsuineq ukioq tapiiffigineqarfusooq sioqqullugu 5. september atuartut qassiunerat tunngavigalugu. Aalajangersakkami tamatumani aalajangersarneqarpoq atuartut amerlanerulernerat ikinnerulerneralluunniit tunngavigalugu nalimmassaasoqartannginnissaa, ukiup ingerlanerani atuartut ilagaluarpata ilanngaraluarpataluunniit, taamaattoq tak. imm. 2-mut nassuiaatit.

Siunnersuutigineqarpoq 5. september kommunimi pineqartumi akileraaruteqartussaaitanermut killigitaasartoq naatsorsuiffiusassasoq.

§ 17, imm. 2-imut

Soorlu § 5-imi takuneqarsinnaasut ukioq atuarfusooq 1. august aallartittarpoq 31. julimilu naammassisarlu. Taamaattumik tunngaviusumik atuarfimmi namminersortitamit atuartut amerlassusiat 1. augustimi allannguuteqartassaaq, pissutigalugu atuartut ilaat atuarunnaarsimassammata allallu atualersimassallutik. Taamaattumik aalajangersagaq ilanngunneqarpoq piffissami 1. augustimiit 31. decemberimut ukiumi tapiiffigineqarfusumi 5. september atuartut qassiunerat tunngavigalugu ingerlatsineremut tapiissutissanik aaqqiissutaasusaaq, taamaalillunilu

ingerlatsinermut tapiissutissat ukiumi atuarfiusumi atuartut qassiunerat malittarissallugu.

§ 17, imm. 3-mut

Atuarfimmik nutaamik pilersitsineqarpat tapiissutissat naatsorsorneqartassapput ukiumi tapiissuteqarfigisami septembarip tallimaani atuartut amerlassusiannik naatsorsuineq tunngavigalugu.

Tunngaviusumik atuarfinnut namminersortitanut nutaamik pilersinneqartunut tapiissutissat tamakkerlutik naatsorsorneqassapput atuartut ukioq qaammatsiuteqarfiusoq tamakkerlugu ukiumi tapiissuteqarfimmi septembarip tallimaani atuartut amerlassuserisassarigaluat aallaavigalugu atuarfiup tamarmiusumik tapiissutisiassarisassarigaluusa 5/12-iinut. Tapiissutit amerlaqatigiinnut agguarlugit naafferartumik tunniunneqartassapput, tak. § 21, imm. 1.

§ 17, imm. 4-mut

Atuarfik nutaamik pilersinneqartoq aningaasanik siumoortumik tunineqarallarnissaminik qinnuteqaateqarsinnaavoq, tak. § 20, imm. 3. Siumoortumik tunniunneqarallartussat naatsorsorneqassapput atuartut ukiumi tapiissuteqarfimmi 1. juni atuarfimmi atuartutut allatsissimasut amerlassusiat tunngavigalugu. Ukiumi tapiissuteqarfimmi 5. september atuarfimmi atuartutut allatsissimasut amerlassusiat tunuliaqutaralugu iluarsiisoqartassaaq. Iluarsisuteqarneq pisassaaq ukiup tapiiffiqineqarfiusup kingorna 1. januar ingerlatsinermut tapiissutit akilerneqarnerannut atasumik, tak. § 21, imm. 3.

§ 18, imm. 1-imut

Ingerlatsinermut tapiissutit saniatigut qinnuteqartoqarnera malillugu angajoqqaat nammineerlutik akiliutaasa apparsaavigineqarnissaannut, atuartunik angallassinermut atuartullu najugaqarfiannut kommunalbestyrelsi tapiisinnaavoq. Kommunit ataasiakkaat namminneerlutik aalajangertassavaat ingerlatsinermut tapiissutit saniatigut allanut tapiissuteqartarusunnerlutik. Ingerlatsinermut tapiissutit saniatigut atuarfiit allatigut tapiiffiqineqarnissamut piunasaqaateqarsinnaatitaanngillat.

§ 18, imm. 2-mut

Kommunalbestyrelsi tunngaviusumik atuarfiit namminersortitat sananeqarnerinut assingusunullu aningaasaliissutinut atuarfinnut tapiissuteqarsinnaallutillu taarsigassarsisisinnaapput. Atuarfiup illutaasut paasineqassapput illuutit tamarmik, tamatumani ilaallutik init atuartsiviit, init faginit mernguernartunut soorlu nipilersornermut, eqaarsaarnermut, iganermut il.il. atorneqartartut, init allaffeqarfiit sulisunullu inissiat. Tamatumani pineqarput illuutit tamarmik tunngaviusumik atuarfiup namminersortup pigisai pigilerumaagaalu. Assingusunik aningaasaliissutit tassaasinnaapput pequtit, pisattat il.il. Kommuni nammineerluni tunngaviusumik atuarfimmu namminersortitamut tapiissuteqarnissamut aamma/imaluunniit taarsigassarsititsinissamut soqutiginninnerminik periarfissaqarnerminillu nalilersuisassaaq.

Kapitali 6-imut

Tapiissutit qinnuteqaatigineqarneri, tunniunneqartarneri, naatsorsuutit kukkunerisuiisoqarnerlu.

§ 19-imut

Takuneqarsinnaavoq kommunalbestyrelsi kommunimi tunngaviusumik atuarfiup namminersortitap ingerlanneqarfianiittoq tunngaviusumik atuarfummi namminersortitamit atuartut allassimasut amerlassusiannik paasissutissinneqartassasoq.

Aalajangersakkami pineqarput paasissutissat tamakkiisut tunngaviusumik atuarfiit namminersortitat tapiissutinik pissarsissagunik ukiumoortumik kommunalbestyrelsimut ingerlatittagassaat. Piumasaqaatitut aalajangersarneqarpoq atuarfiup kommunalbestyrelsi paasissutissittassagaa atuartut aqqinik inuttullu normuinik aammalu atuartut atuartussaataasuunersut. Paasissutissat tunniunnissaannut piffissaq killiliunneqarpoq 1. oktober, tassami atuarfik atuartut amerlassusiannik 5. september aatsaat naatsorsuisassammat. Atuartut pillugit paasissutissiisarnissamut pissutaavoq kommunip qulakkeersinnaasarniassamagu kommunimi atuartut atuartussaataasut ukiullit tamarmik ilumut atuarfinni atuartitaanersut angerlarsimaffinniluunniit atuartinneqarnersut.

Tunngaviusumik atuarfiup namminersortitap allattukkat qinnuteqaammut, tak. § 20 imm. 1, peqatigitillugit kingusinnerpaamik 1. oktober kommunalbestyrelsimit tiguneqareersimanissaat qulakkiissavaa. Allattukkat kommunalbestyrelsimit kingusinnerpaamik 1. oktober tiguneqareersimanngippata ukiumut tapiiffigineqarfiusussamut tullermut tapiissutisisinnaatitaaneq annaaneqassaaq. Kommunip ukiumut tullissamut tapiissutit tunniussinnaagaluarpai, tunngaviusumilli atuarfik namminersortitaq tapiissutinik inatsisitigut piumasaqarsinnaanngilaq, killissarititaq qaangerneqarsimappat.

Kommunit misissuineranni erserpat atuartoq ataaseq atuarfinni marlunni ataatsikkut nalunaarsimasoq, taava atuartup sorlermut attaveqarnera atuarfiit pineqartut qularnaallissavaat.

Imm. 1-imi 2-milu aalajangersakkat siunertaraat inatsit manna naapertorlugu atuartut amerlassusissaasa tapiissuteqarfigineqartussat siumoortumik nakkutiginiarneqartarnissaat. Taamaaliornikkut tapiissutissat naatsorsorneqartarnerat isumannaannerujussuannugssaaq. Ilutigitillugu kommunit namminneq aningaasatigut siumut missingersuusiornissaannut pitsaaqutaaginnartussaavoq, sapinngisamik siusissukkut ilisimariissallugu atuartut sorliit ingerlatsinermit tapiissutinik qinnuteqarnermi tunulequtaanersut.

Atuartut kommunimi inuit nalunaarsorsimaffianni septembarip ulluisa tallimaanni allassimasut meeqqallu atuarfianni imaluunniit tunngaviusumik atuarfimmi namminersortitami allami atuartuunngitsut allattorsimaffiat uppersaaserlugu atsiugaq kommunalbestyrelsip atuarfimmu nassiutissavaa. Allattorsimaffik ingerlatsinermit tapiissutip qanoq annertutiginissaanik ilalik, tak. § 20, imm. 2, tunngaviusumik atuarfiup namminersortitap tigoreersimassavaa kingusinnerpaamik novembarip aallaqqaataani. Tunngaviusumik atuarfiup namminersortitap nalunaarsugaq nalunaarullu piffissarititaasup qaangiunnerani tigusimanngippagu, tunngaviusumik atuarfiup namminersortitap atuartunik allatsissimasunik nalunaarsugai tunngavigalugit ingerlatsinermit tapiissutissat naatsorsorneqassapput.

Piffissatut killiliussaq aalajangersarneqarpoq tunngaviusumik atuarfiit namminersortitat ukiumut tullissamut missingersuusiornissaaminnut periarfissinniarlugit. Eqqunngitsoqarsorineqarpallu januaarip ulluisa aallaqqaataanni akiligassat siulliit akiligassanngunnginneranni tamatuma naammassineqarnissaannut atuarfiit periarfissinneqarlutik.

§ 20, imm. 1-imit

Ukioq tapiissuteqarfiusussaq sioqqullugu 1. oktober nallertinnagu atuarfiup kommuni ukiumut ingerlatsinermit tapiissuteqarnissamik qinnuteqarfigissavaa. Immikkut pissutissaqartoqartillugu piffissaliussaq kommunalbestyrelsip sivitsorsinnaavaa. Pissutsit immikkut ittut assersuutigalugu tassaasinnaapput, atuarfiup allaffissornikkut periaasii qarasaasiakkut atortutigut ajornartorsiuteqarnerup sulisoqarnikkulluunniit ajornartorsiuteqarnerup kingunerisaanik piffissap ilaani atorsinnaasimanngippata. Kommunalbestyrelsi naliliissaaq piffissaliussap sivitsornissaananut immikkut pissutissaqarnersoq. Kommunalbestyrelsip piffissaliussaq sivitsorsinnaavaa nammineerluni imaluunniit tunngaviusumik atuarfiup namminersortitap qinnuteqarneratigut.

Tapiissutissat allat pillugit qinnuteqarfissaq killiliivigissanerlugu kommunip nammineerluni aalajangertassavaa. Ilimagineqarpoq atuarfik ukioq naallugu qinnuteqartarsinnaassasoq, kommuni ingerlatsinermit tapiissutissaanngitsunik allanilli qinnuteqarnissamut killissarititamik aalajangersaasimanngippat.

Killiliussaq maleruarneqanngippat kinguneqaataasinnaasut pillugit § 19-imut nassuiaatit innersuussutigineqarput.

§ 20, imm. 2-mut

Ukioq tapiissuteqarfissaq sioqqullugu 1. november nallertinnagu kommunip atuarfik tapiissutissatut akuersissutigineqartut annertussusiannik nalunaarfigissavaa. Tamaaliormi siunertaavoq atuarfik periarfissinneqarpoq ukiumut tullermut aningaasanut ukiorisassamut aningaasatigut siumut missingersuusiornissamut.

Killiliussaq maleruarneqanngippat kinguneqaataasinnaasut pillugit § 19-imut nassuiaatit innersuussutigineqarput.

§ 20, imm. 3-4-mut

Atuarfinnut nutaanut tapiissutit siumoortumik tunniunneqarallarnissaannik qinnuteqaat kommunalbestyrelsimit ukiumi tapiissuteqarfigisami kingusinnerpaamik 1. juni tiguneqaareersimassaaq, kommunalbestyrelsillu tunniussinermut peqatigitillugu tapiissutit siumoortumik tunniunneqarallartup angissusia nalunaarutigissavaa, tak. § 21, imm. 3. Nalunaarut tunngaviumik atuarfimmit namminersortitamit ukiumi tapiiffigineqarfimmi kingusinnerpaamik 1. juli tiguneqaareersimassaaq. Siumoortumik tapiissutaagallartut qaammatinut marlunnut akilerneqassapput - augustimut septemberimullu, tassalu ingerlatsinermut ukiumoortumik tapiissutit tamarmiusut 2/12-ii.

Qinnuteqarfissatut piffissaq killiliussaq aalajangerneqarpoq, kommunit taamaalinerani meeqqat atuarfianni atuartunik allattuinerit pigisarmatigit. Kommunip tapiissuteqarnissamut neriorsuuteqarnissaa aalajangiivigineqarpoq tapiissutissap annertussusilernissaata naatsorsornissaanut suliamik ingerlatsinissaminut kommunip naammattumik piffissalernissaa qulakkeerumallugu.

§ 20, imm. 5-imut

Tapiissutinik qinnuteqartarnissamut erseqqinnerusunik maleruagassiornissamut Naalackersuisut piginnaatinneqarput. Maleruagassanik amerlanerusunik pisariaqartitsisoqassappat Naalackersuisut piareersimapput KANUKOKA suleqatigilluinnarlugu tamakkuninnga suliarinninnissamut, taamaalilluni taakkua kommunit ingerlatsivii aamma isiginiarlugit suliarineqarsinnaaniassammata.

§ 21, imm. 1-imut

Nalinginnaasumik ingerlatsinermut tapiissutit kommunalbestyrelsip sisamanut angeqqatigiinnut agguarlugit naafferartumik 1. januar, 1. april, 1. juli aamma 1. oktober tunniuttassavai. Naafferartumik agguarlugit tunniunneqartarnissaannut pissutaavoq kommunit qaammatikkuutaartumik ataatsimoortunik tapiissutinik pissarsitineqartarnerat, taamaattumillu tunngaviusumik atuarfennut namminersortitanut tapiissutissat qaammatit pingasukkaarlugit tunniunneqartassappata kommunip tigoraaannarnik aningaasaqarneranut sunniuteqarujussuarnaviaratik. Tamatuma peqatigisaanik atuarfiit aningaaserivinnit aningaasanik annertuumik atuisinnaatitaanissaq isumalluutigissannngilaat. Aammattaaq tunuliaqutaavoq tapiissutit aningaasanut ukioq malittussaammassuk, taamaattumik agguarlugit naafferartumik akiliutissaq siulleq tunniunneqartussaavoq 1. januar, kiisalu tunuliaqutaavoq atuarfiup nutaamik pilersinneqartup tapiissutit pisussaammagit kingusinnerpaamik atuarnerup aallartinnerani 1. augustimi.

§ 21, imm. 2-mut

Ingerlatsinermut tapiissutit iluarsissutaat, tak. § 17, imm. 2, ukiumi tapiiffigineqarfiusumi tulliuuttumi 1. januarimiit akiliutissat siulliit akilerneqarnerannut atasumik akilerneqassapput. Iluarsissutit aatsaat ukiup tulliani akilerneqarnissaannut tunuliaqutaavoq kommunit tamatumani missingersuusiorminni taakkua ilanngunnissaannut periarfissaqaqqullugit.

§ 21, imm. 3-mut

Kommunalbestyrelsip ukiumi tapiiffigineqarfiusumi 1. juli nallertinnagu tapiissutinut akiliutaagallartussat akilissavai. Tapiissutissaviit ukiumi tapiiffigineqarfiusumi 5. september atuartut qassiunerat tunngavigalugu naatsorsorneqassapput. Tapiissutit amerlanaarlugit ikinaarlugilluunniit tunniunneqartut ukiumi tapiiffigineqarfiusumi 1. januarimi akiliutissat siulliit akilerneqarnerannut atatillugu aaqqiivigineqassapput.

§ 21, imm. 4-mut

Imm. 4-mi aalajangersakkami kommunalbestyrelsi inatsisitigut pisinnaatinneqarpoq tapiissutinik tunniussinnginnissaminut tapiissuteqanngitsornissamulluunniit, atuarfiit inatsimmi aalajangersakkat imaluunniit peqqussutit kommunalbestyrelsimit pilersinneqarsimasut maleruanngippatigik, tak. § 12. Tapiissutit tunniunnaveersaarneqarsinnaapput atuarfiit pissutsinik iluarsiiimanerminnik uppersaanissaasa tungaanut. Tapiissutissanik naatsorsuineranut tunngavissatut atuarfimmit nalunaarutigineqartut kukkuneqartut paasinarsippata, kommunip aammattaaq tapiissutit uterteqqusinnaavai, tapiissutit inaarutaasumik tunniunneqarsimagaluarpataluunniit. Aalajangersakkami siunertarineqarpoq

naatsorsuineri tunngavigineqartut kukkuneqarnerisigut atuarfiup naatsorsuineri eqqortumik tunngavilersuisussaataaneraningarnit amerlanerusunik tapiiffigineqarneq kingunerisimappagu.

Kommunip Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni § 19 maleruartaavaa, taamaalilluni kommuni pisussaavoq aalajangiisoqannginnerani suliaassap atuarfimmit namminersortumit oqaaseqarfigineqarnissaanut saqqummiutissallugu. Taamatuttaaq Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni §§ 22-24-mi tunngavilersuineqassaaq.

§ 21, imm. 5-imut

Tapiissutit amerlanaakkat kommunip tapiissummik akuersissuteqartup pisassarai. Kommunip nammineerluni aalajangissavaa amerlanaarluni tapiissutit ingerlatsinermut tapiissutissani tunniunneqarumaartussani ilanngaatiinnarumanerlugit. Amerlanaarluni tunniussinerup uppersineqarnerat kingornagut naafferartumik tunniussassanut siullernut kommuni ilanngaateqarsinnaavoq.

§ 21, imm. 6-imut

Naalackersuisut piginnaatinneqarput tapiissutit tunniunneqartarnissaat pillugu maleruagassaliornissamut. Pisariaqartinneqarpat maleruagassat taakku KANUKOKA aamma qanittumik suleqatigalugu suliarineqarsinnaapput. Tunngaviumik atuarfiit namminersortitat ilanngunneqarsinnaagaangata pissusissamisuuginnassaaq aamma taakku ilaatinneqartarnissaat.

§ 22, imm. 1-2-mut

Aalajangersakkap qulakkeerpaa ukioq naatsorsuuteqarfik tassaasoq ukioq qaammatsiuteqarfiusoq. Naatsorsuutit kukkunerisineri ileqqut nalinginnaasut pitsaasullu naapertorlugit naatsorsuutit ingerlanneqarlutillu kukkunerisiorneqartassapput.

Piomasarineqarpoq atuarfiit naatsorsuutaasa naalagaaffimmit akuerisaasunit imaluunniit kukkunerisuisutut nalunaarsugaasunit kukkunerisiorneqartarnissaat, naatsorsuutillu tunniunneqarsimaffissaat killiliivigineqarluni ukiup tapiissuteqarfigineqartup tulliani kingusinnerpaamik 1. juni. Naatsorsuutit kommunalbestyrelsimit tigunegareersimassapput kingusinnerpaamik 1. juni. Tamanna maleruarneqanngippat kommunit ingerlatsinermut tapiissutinik tunniussinaveersaarnissaminnut imaluunniit tapiissutit piffissamut

naatsorsuuteqarfiusumut tunngasut utertillugit tiguneqarnissaanut piunasaqaateqarsinnaapput. Kommunalbestyrelsi piffissamit killiliussamit immikkut akuersissuteqarnissamik nalunaaruteqarsinnaavoq.

Naalagaaffimmit akuerisaasumit imaluunniit kukkunersiuisutut nalunaarsugaasumit kukkunersiuisoqarnissamik piunasaqaammut pissutaavoq naatsorsuutit kukkunersiuisarnissamik ileqqussamut pitsaasumut maleruagassat malillugit naatsorsuutit kukkunersiuisoqartarnissaa taamaaliornikkut qularnaarneqarsinnaammat.

Kapitali 7-imut

Tunngaviusumik atuarfiit namminersortitat ingerlatsinermut tapiissutinik pisannngitsut

§ 23-mut

Atuarfiit ingerlatsinermut tapiissutinik pissarsinissamik kissaateqanngitsut, Inatsisartut inatsisaanni matumani aalajangersakkat eqqortittussaavaat, taamaallaat uku pinnagit:

- 1) suliffeqarfiit imminnut pigisut pillugit maleruagassat eqqortittariaqanngilaat, tak. § 6,
- 2) pisortat atuartitsisullu aningaasarsiassaat pillugit maleruagassat eqqortittariaqanngilaat, tak. § 8,
- 3) Naalakkersuisunit tunngaviusumik atuarfiit namminersortut, tapiissuteqarfigineqarnissaminnik kissaateqartut, pilersinneqarnissaat pillugu malittarisassaannut aalajangersarneqartunut ilaatinneqassanngillat, tak. § 9, imm. 3,
- 4) tapiissuteqarnissamut piunasaqaatit aammalu tapiissutit atorineqarnissaat pillugu malittarisassat eqqortittariaqanngilaat, tak. kap. 4,
- 5) tapiissuteqariaatsit tapiissutissanillu naatsorsuineq pillugu malittarisassat eqqortittariaqanngilaat, tak. kap. 5, taamaattorli kommunalbestyrelsi tapiissutinik taarsigassarsiniarnernilluunniit allanik qinnuteqarfigisinnaallugu, tak. kap. 18 kiisalu
- 6) tapiissuteqarnissamut qinnuteqaatit, tapiissutit tunniunneqarneri, naatsorsuutit kukkunersiuiunerlu pillugit maleruagassat eqqortittariaqanngilaat, tak. kapitali 6, taamaattorli septembarip tallimaani atuartut pillugit paasisutissat kommunalbestyrelsimut ingerlatittussaavaat, kommunalbestyrelsillu kommunimi atuartut inuit nalunaarsorneqarfianni allassimasut aamma meeqqat atuarfianni imaluunniit tunngaviusumik atuarfimmi namminersortitami allami nalunaarsimannngitsut pillugit allattukkat atsiukkat nassiutissallugit, tak. § 19, imm. 1 aamma imm. 2, oqaaseqatigiit siulliit.

Kommunalbestyrelsip qulakkiigassaa ataaseq tassatuaavoq atuartut tunngaviusumik atuarfinni namminersortitani atuartuusut tapiiffigineqartanngitsulli meeqqat atuarfianni piunasarisaasunut nalinginnaasunut nallersuuttumik atuartinneqarnissaat.

Taamaattumik aalajangersakkat qulaani taagorneqartut atuarfinnut taakkununga atuutsinneqanngillat. Atuartut nalunaarutigineqartarnissaat pillugu, matumani atuarunnaartut nalunaarutigineqartarnissaat pillugu maleruagassat atuarfinnut tapiissuteqarfigineqartanningsunut aamma atuupput, taamaalilluni kommunalbestyrelsi periarfissaqarniassammat qulakkeertassallugu atuartut atuarfinnut arlalinnut allatsissimasanninnissaat, aammalu kommunalbestyrelsip qulakkeersimaniassammagu kommunimi atuartut tamakkerlutik meeqqat atuarfianni nalinginnaasumik piumasaqaataasartunut nallersuuttumik atuartinneqartarnissaat.

*Kapitali 8-mut
Angerlarsimaffimmi il.il atuartitaaneq*

§ 24, imm. 1-2-mut

Aalajangersakkami aalajangersarneqarpoq angajoqqaat kommunalbestyrelsi allakkatigut nalunaarfigissagaat meeqqamik atuartitaanissaat nammineerlutik isumagigunikku. Atuartitaaneq aallarnerneqartinnagu nalunaaruteqarneq pissaaq. Nalunaarutip imarissavai meeqqat kikkut atuartitaanermi peqataassanersut, sumi atuartitaaneq ingerlanneqassanersoq kiisalu kikkut meeqqanik atuartitsisuunissaat pillugit paasissutissat.

Kommunimi meeqqanik atuartussaataitasunik tamarmiusunik malinnaanissamut kommunalbestyrelsi malinnaasinnaaqullugu angajoqqaat nammineerlutik meeqqamik atuartitaanerannik isumaginnittut kommunalbestyrelsimut tamatuminnga nalunaarutiginnissapput. Taamaattoqanngippat kommunalbestyrelsi akuliutissaaq, qulakkeerlugulu taakkua kommunimi meeqqat atuarfianni imaluunniit tunngaviummik atuarfimmi namminersortitami atualersinneqarnissaat.

Apeqqutaanngilaq angajoqqaat namminneerlutik meeqqanik atuartitsisuunissaat. Aammami atuartitsisoq tassaasinnaavoq eqqaamiu imaluunniit alla. Taamaallaat kommunimut nalunaarutigineqassaaq kikkut atuartitsineq ingerlattarneraat. Taamatuttaaq aamma nalunaarutigineqassaaq atuartitsinerup sumi ingerlanneqartarnissaa, tassa angerlarsimaffimmi imaluunniit aalajangersimasumi allami. Tamatumunnga tunngaviuvoq atuarnerup sumi ingerlanneqartarneranik kommunalbestyrelsip nakkutilliinermik ingerlatsinermik isumaginnittutut ilisimanninnissaa.

§ 25, imm. 1-3-mut

Kommunimi najugalinnut meeqqat angerlarsimaffimmi il.il. atuartitaanerat pillugu kommunalbestyrelsi nakkutilliisutut pisortatut oqartussaasuvoq. Nakkutilliinissaaq ingerlanniarlugu kommunalbestyrelsi ukiut tamaasa misiliisitsisarsinnaavoq,

naliliiviginiarlugu meeqqat atuarianni nalinginnaasumik piunasaqaataasunut nallersuuttumik meeqqat atuartinneqartarnersut. Piunasaqaataanaviannngilaq ukiut tamaasa misilitsitsisarnissaq, kisiannili kommunalbestyrelsip taamaaliortitsisarnissaq pisinnaatitaaffigaa meeqqat ilikkagaqariartornerat malinnaaviginiarlugu. Atuartitsisoq kommunalbestyrelsi isumaqatigiissuteqarfigalugu misilitsinnernut aqutsisuunissamut pisinnaatitaaffeqarpoq.

Kommunalbestyrelsi isumaqarpat atuartitsineq isumannaatsuunngitsaq, qaammatit pingasut qaangiunneranni misilitsitseqqittoqarnissaa isumagineqarsinnaavoq. Sulili atuartitsineq amigaateqarpat kommunalbestyrelsi pisinnaatitaavoq meeqqat atuarianni atuartinneqarnissaannik aalajangiinissamut. Qaammatinit pingasunit sivisunerusumik kommunalbestyrelsi piffissaliisinnaalluarpoq § 10, imm. 4-mi mianerisassatut nassuiaatini taagukkat aallaavigalugit.

Kommunalbestyrelsip angajoqqaat ilisimatissavai qaammatit pingasut qaangiunneranni nutaamik misilitsitsineqarumaartoq, aammalu misileeqqinnerup kingornagut atuartitsineq suli amigaateqarpat meeqqat atuarianni atuartinneqalerumaartut. Tamatumunnga tunuliaqutaavoq angajoqqaat atuartitsinermi amigaataasimasunik iluarsiinissamut periarfissinneqassammata.

§ 26-mut

Naalakkersuisut pisinnaatinneqarput meeqqat angerlarsimaffimmi atuartinneqartut meeqqat atuarianni inaarutaasumik nalilersorneqartarnissaannut misilitsittarnissaannullu qaqugukkulluunniit atuuttussanik maleruagassaliornissamut. Tamatumunnga maleruagassat assigissavaat atuartunut meeqqat atuarianni namminersorlutik inaarutaasumik nalilersuiffigineqartussanut misilitsittussanullu maleruagassat.

Kapitali 9-mut Angajoqqaat pisinnaatitaaffii pisussaaffiilu

§ 27-mut

Angajoqqaatut oqartussaasup nammineq qitornarisaminut pisinnaatitaaffii pisussaaffiilu pillugit nammineersinnaatitaanermik inatsimmi tunngavittut allassimasut ilaannik imm. 1 uteqqiineruvoq.

Imm. 2-mi aalajangersagaq tunngaviligaavoq atuariup angerlarsimaffiullu akornanni eqaatsumik suleqatigiinnissaat eqqarsaatigalugu. Aalajangersakkap assinga meeqqat atuariat pillugu inatsisartut peqqussutaanniippoq.

*Kapitali 10-mut
Atuutilerfia*

§ 28-mut

Inatsisartut inatsisaat 1. juni 2003-mi atuutilissaaq. Piffissap atortuulersitsiffiusup kingunerissavaa tunngaviusumik atuarfiit namminersortitat pilersinneqartussat naalackersuisunut kommunalbestyrelsimullu nalunaarutigineqarnissaannut piffissaqartinneqarnissaat, aammalu tapiissutinik qinnuteqaatit ima siusitsigisumik tunniunneqarsinnaanissaat suliarineqarsinnaanissaallu, tunngaviusumik atuarfiit namminersortitat 1. august 2003-mi atuartitsinerminnik aallartitsisinnaalerlutik.